



順菴集

十二

墓誌

廿十五

~ 16
2379
12



和
2379
15-12



順菴先生文集卷之二十二

墓誌

故司成鄭公淑人趙氏壙誌 已卯

崇禎後三已卯三月朔合葬故司成海州鄭公廣運淑人白川趙氏于廣州清涼山酉坐原略誌其世與德由貞度公易九世至獻納有徵又三世至公由宣廟名臣承旨庭堅五世至淑人公敦孝友重信義廉謹剛敏綽有聲譽淑人在室及歸俱以孝著夫服闋竟以貞殉嗚呼其賢而烈哉公丁亥生庚戌科丙子卒淑人長公二歲後公二歲卒生同德死同穴有



八子女龍祚龜祚鳳祚麟祚權默李錫周二女未行人謂餘慶在後徵之理信矣乎

子婦尹氏壙銘 丁亥

安氏婦恭人坡平尹氏之墓父東說妣李氏夫景曾登進士四女稚一子子戊申生丁亥沒葬德谷癸坐原性勤儉壽不延舅鼎福痛而鐫

先妣恭人李氏壙誌 丁亥

考益齡孝寧大君補之後妣青松沈氏 肅廟甲戌生年十七歸于故通德即廣州安公極孝慈聰達婦道克備七十四歲丁亥八月卒十月丁卯葬廣州靈

長山通德公壙東生二男監察鼎福鼎祿一女吳錫信孫進士景曾內外孫曾男女凡十四人

淑人昌寧成氏壙記 乙未

淑人昌寧成氏 東宮衛率廣州安鼎福之妻也父純母慶州金氏己丑生乙未歿一子景曾生員一女適權日身內外孫曾男女十一人性孝謹勤儉端潔謙下葬于德谷亥坐崇禎後三乙未三月辛亥誌

秀才郭君墓誌銘 辛卯

郭君弼勳字士欽包山人遠祖子儀仕高麗為金吾衛校尉八本 朝有郡事安邦選廉白鄉人立祠祀

之有諱趙文科郡守退溪祭文稱其賢有諱衛國
仁廟丁丑倡義勤王後官縣監於公為五七代祖曾
祖諱壽梓祖諱在全無嗣取從兄進士諱在一之子
諱正朝為後即君之先考也郭氏為嶺外名族世有
聞人而進士公及其先府君佐郎公諱壽龜俱以文
辭墨妙著於一時妣平山申氏進士諱瑗之女稟質
明粹學有聲稱性篤孝生養病憂殫其誠及遭外艱
哀毀過度定省之外足不入中門衰經三年執禮不
忒其待人簡實無邊幅持身刻勵有不拔之操年踰
弱冠赴京試而歸歎曰此不足以為士遂取濂洛書

讀之勒苦殆忘寢食手書古人箴警揭壁而觀省為
常曰平居與妻孥共處志氣昏惰邪心易生雖在昏
夜燕處之中矜持愈嚴而愛誦志士溝壑之句以自
勵焉其所存可知也君生於 當宁辛亥五月日歿
于丙戌十二月甲寅得年三十六葬于尼山之負壬
原配晉州姜糾之女生先於君三年歿後於君五年
葬於甌本負坎原姜氏亦有婦道生一男一女男崇
敬娶廣州安景漸女女幼安君景漸憐君有志而無
命錄其狀示余曰此吾友郭君狀也且曰孝為百行
之源而郭君能之貧為萬惡之本而郭君安之好學

聖人之所未見而郭君好之則是未可以傳耶景漸
余友也銘友之友維其實而已何以文為銘曰
既稟之全胡闕其年固天道之難謀嗣子維肖堂構
克紹可以寬君之心

孺人竹山安氏墓誌銘 壬辰

孺人姓安氏籍竹州正節兼持平諱弘望諱鎮諱瑞
鳳即其曾祖祖考三世而妣清州韓氏諱普女孺人
幼而明慧能通經史習婦儀及長歸于密陽朴公東
皇事尊章承夫子孝敬無違歲癸卯丁姑憂乙巳夏
朴公卒冬遭舅喪荐罹巨創孺人含恤忍痛為朴氏

門戶計奉饋莫恤幼孤終三年無憾親黨皆補之性
廉潔雖貧乏未嘗受非義之物婢僕或有所獻雖菁
菑瓜果之微必問其所從來嘗斥湖庄有數百金
有以子母債求者輒曰錢無生雛之理貸則可債則
不可視人之富貴若將浼已聞人之饑雖值屢空必
傾貯以資之蓄物之家養者不忍食其肉或有自斃
者必掩埋之其慈仁有如此者素不喜巫覡之屬戒
子孫常以義方孺人生於我 明陵庚午十月二十
一日卒于己卯四月十八日葬于廣州之荒山先塋
西坐原左距朴公之藏百步而遠一男一女男志宗

女適金熙績志宗娶平壤趙壽德女生四男一女男
基明重明在明奎明女適生負安景曾熙績有三男
皆幼基明以銘來請余以通家之義雅知之不得辭
也銘曰

孺人之賢足以裕其昆有孫之賢足以承其繁荒山
之阡百世勿替我其銘之以相來裔

通訓大夫行尼城縣監洪公墓誌銘

鼎福少從儕友聞有洪公誠彥願與交而未幾病廢
未果今者公督上舍克浩持喪手家狀來屬於鼎福
曰吾祖曾兩世墓銘受之于星湖先生先考幽堂之

文必欲求先生之徒而公其人也願以為請鼎福辭
不敢而終不敢固辭則上舍之意不在于文謹按公
諱純輔誠彥其字也系出安東府之豐山縣其先曰
侃號洪厓仕麗朝為都僉議舍人以文章直諫顯八
世而有諱履祥號慕堂以經術文章佐我 宣廟官
大司憲於公為五世祖也曾祖諱柱天陽城縣監
贈左資成祖諱萬朝判敦寧府 贈領議政諡貞翼
考諱重徵行工曹判書致仕奉朝賀諡良孝妣 贈
貞敬夫人東萊鄭氏瑀女即右議政懶菴彥信之後
公生于 肅廟丙戌十一月幼岐嶷不羣貞翼公奇

愛之目之謂掌珠年甫舞象文詞日進長益自勵為學駢儷對策之工曹偶推重癸丑登上庠華聞大播癸亥丁內艱哀毀踰禮葬因廬墓下朝夕哭菴風雨不少廢丙寅以後散解者四入選者三而皆不中人皆為公惜之辛巳遭外艱自京第奉筵還溫陽郡之梧泉舊墅公時年五十六守制一如前喪制闋廢舉業鄉居問桑麻課花竹每值令節會親戚為花樹之會飛觴吟賦樂而忘憂己丑時宰以公為名家子未成一名除萬寧殿叅奉翌年例陞繕工監副奉事監董欽奉閣安皇朝勅書事竣陞終仍命入

侍教銓曹曰其父祖陪兩朝俱入耆社豈可以尋常即官視之即日拜漢城府主簿六月除尼城縣監異數也縣當孔道多豪右既下車訪弊之為民害者先是良丁投匿巨室軍額多曠徵攤倍他邑公搜括不少饒填充無闕有一豪族勒良產為奴公發其奸一邑稱快值年豐錢貴則捐廩俸而蠲結錢當試場之役則務從簡約一以便民為政居官五年弊祛事治恩威并行歲甲午公歎曰古人致仕之期在明年衰年吏役豈素心哉遂棄官歸翌年感疾疾革招親戚與訣教勅諸子屏婦女勿使前而卒即閨

十月二十日享年七十十二月乙巳合窆于前配排
方山壬坐之原公為人端勅簡默幼服家庭之訓長
敦子弟之行性至孝家世雖清貧而甘旨不乏比喪
戚易俱盡母夫人有痼疾十載沉嬰左右扶將衣不
解帶疾甦至血指以祈瘳母夫人嘗嗜牛腩肉丁憂
以後至老不忍食尤謹於奉先日必冠帶謁廟當諱
辰哀慕竟日品羞必稱情而後已在官時備送內外
先世忌墓之需一意豐腆不以邑力殘薄而少替自
以支孫不得奉貞翼公祀雖俗節朔朝之奠必備物
以送務盡誠意又手寫先稿八卷藏于家蓋其事親

向先之誠天植然也平居恬靜自守簡出入視世之
工為時俗態者若將浼已終日端坐門庭肅然良孝
公屢典字牧素廉白而公將順之一塵不染及歸假
貸猶前配泗川睦氏進士天光之女大司憲林一之
孫左議政來善之曾孫婉嫗有婦德幹家事事尊章
一以公為心養親服食之物必自為之未嘗倩人當
寒手皴坼而不以為勞承顏順志常不離側母夫人
嘗謂公曰吾有一婦而不羨人之十婦也生先公三
歲歿於癸亥四月壽四十一生三男一女後配青松
沈氏宅良之女柔順宜家無育撫愛前配子女如已

出宗黨稱其美生於庚子歿於戊申四月壽六十九
祔葬公墓左異封男長克浩生員有一女婿權世林
次梯漢早逝取再從子樂叟為後次旭浩有三子一
女子樂胄樂膺樂靖婿李壤億女適李趾漢有一子
基崧官脩撰庶男一曰吉浩內外孫曾若干人銘曰
豐山之胄承先業趾美光前令聞赫晚監一縣諳治
蹟終焉投紱反初服有美淑人婉厥德劔合重泉排
方麓

草亭朴先生墓誌銘

並序

公諱應善字而吉務安人朴氏源出新羅始祖中分

為十數貫務安其一也高麗顯宗時有左僕射暹以
勳閥著七傳而入我朝有刑曹判書義龍又四傳
而有溫陽郡守晉卿於公為高祖自勝國至此代列
簪紳司議諱堰縣令 贈叅判諱仁豪開城都事
贈吏判號南村諱璘即其三世也妣 贈貞夫人坡
平尹氏右叅贊鉉之女萬曆乙亥十二月六日生公
幼穎秀有志操雅好讀書稍長受業于知退堂李公
廷馨慨然有求道之志肆力於脩業旋遭壬辰之亂
南村公扈從西行公奉伯母李夫人及繼妣沈夫人
避兵于春川當奔竄之中而力學不懈令聞日彰韓

父菴百謙鄭愚伏經世折輩行與交丁戊之際主昏政亂遂廢舉業自號淨翁盖不受染汚之意也尋卜居于原州之蟾江癸亥仁祖改玉選賢良士公與姜復泉鶴年趙龍洲綱膺薦直拜恩津監縣以興學為已任課校儒朔望講誦程式甚嚴人頗苦之及丙寅戶牌法行儒生落講者簽丁恩獨免焉於是人皆感誦丁卯建奴東創公調兵糧吏無緣為奸搆誣公授書行朝上命火之亂稍定公引歸已巳拜戶曹佐郎陞正郎時臺啓汰三曹即以蔭進者而公不與焉公耻之遂呈辭因除淳昌縣監未周而以

戶郎時事罷非其罪也壬申拜刑曹正郎尋出為朔寧郡守甲戌以微事罷乙亥拜軍資監判官移丹陽郡守冬以病罷歸丙子三月十六日卒于京第享年六十二某月日葬于陽城治西棗谷卯坐原後以曾孫澄貴贈司憲府執義公五歲而先夫人卒伯父母收養之後皆服喪三年以報其恩甲午伯母卒乙未南村公解官卒於開城翌年繼妣卒三年之間荐罹巨創雖亂離倉况而持服愈謹哀毀踰節遂成終身羸瘁之疾有兩妹一弟撫愛甚篤弟與子穉同年同學及弟夭歿悲慟不忍課授耆者殆半歲祭禮一

遵家禮齋戒澡潔務盡誠敬居官事外神未嘗使人
攝行遇宗黨以恩必置酒食而歡樂之庶從祖之妻
老寡無子而依於公貲產頗饒及歿備物歛葬置守
塚田僕不取一物人以為難教諸子勸課篤而策勵
嚴子男五人皆知名於世訓導後進多成就若李監
司命雄洪參議瑱其尤者也居官務遵科條不阿權
勢束吏嚴而綜覈明投書之變淳昌之罷蓋緣縣吏
曹胥慙愚而然也公家素貧而清修苦節終始不渝
累經郡縣田園無尺寸增性又儉素自幼未嘗御華
侈之服洪監司得一少時友也嘗衣繡巡關東邂逅

逆旅同寢洪閣寢具歸語人曰與某共宿錦衾華美
耻不敢出其見重於朋儕如此所與友皆一代名流
羣居終日端坐儼然口絕諠語門無雜賓燕會音樂
之所不肯赴焉晚構茅屋數間因號草亭環堵蕭然
不以事物經心日必蚤起整衣冠讀書至于夜分潛
玩經傳剖析精微融會而後已嘗手寫自警文四條
揭壁而觀省之曰立心忠信寬厚切戒欺詐刻薄持
身嚴重廉潔切戒率爾苟且處事深密堅固切戒淺
露撓改接物莊敬溫和切戒輕慢粗暴尤精於禮考
儀禮家禮大明律本朝大典等書作四井橫看間

附己意且記天子諸侯正統服君為臣臣為君服卿大夫士庶人服師友服弔服等說作一冊欲圖以明之而未脫藁平生著述多散佚於兵燹云配淑人全州李氏判書坡谷誠中之女長於公二歲閨範之懿已成于家年十八歸于公執婦道謹一遵公意隨公在官苞苴不行公深敬重之己巳四月十二日卒葬祔公墓生五男二女男長縣監稭次叅奉稭次佐郎桂次進士稭次穉女適縣監趙嶮牧使李晟側室二女嫁李焜洪又徵稽無子系子昌道稭一子天用四女適申墨叅奉李錮金正徵進士許穩桂六子 贈

吏叅昌夏昌道出系昌殷昌周承旨昌漢昌東一女適生負李陽來稭二子昌佐昌萬二女適安廷燧李瑀穉二子昌徵昌徽趙嶮二子縣監性乾惟乾三女適叅奉蘇亨字叅奉鄭泰廷鄭洙仁李晟系子文碩內外曾孫七十餘人今至七世八世而始至千人聳窩丈思正即公之耳孫而叅判子右尹諱澄之孫掌令古心齋諱履文之子也收拾公之言行而狀之屬鼎福而語之曰先祖之歿今百四十有餘年幽堂無誌墓道闕刻其何以詔我稚昧乎不朽之託雖在巨匠而又難其人記事惟實子其圖之鼎福牢辭不得

拜受而謹序次如右銘曰

世稱德門曰惟繇城粵在勝國僕射圖形爰及 聖
朝官隆判刑流派遠揚代列簪纓孕精毓秀公乃挺
生谷蘭播芬名揚王庭累佩銅章吏戢民平推其所
學宜大厥施奈屈于時竟未有為四條自警行不詭
竒禮書有編可徵公私存深積厚裕後為基京尹發
跡心齋襲規收芳拾馨聲窩在而掇輯為銘豈敢溢
辭

通訓大夫行刑曹佐郎 贈通政大夫吏曹叅

議朴公墓誌銘 並序

公諱桂字大時姓朴氏務安人始祖進昇高麗國學
典酒子暹佐顯宗官左僕射遂大顯七傳至義龍八
本 朝官刑曹判書跨歷兩代七百餘年世襲簪紱
稱東韓名閥曾祖義城縣令 贈戶叅諱仁豪祖開
城都事 贈吏判諱璘考丹陽郡守 贈執義諱應
善號草亭 仁祖初以儒學選用妣淑人全州李氏
戶判號坡谷誠中之女萬曆甲辰九月公生公兄弟
五人公其第三也長習家庭之訓與兄縣監稽叅奉
糴弟進士穉皆以文行名於世丙子春丁外艱又喪
仲兄旋遭虜變避兵于南陽海島丁丑轉泊于務安

地冬喪次弟戊寅與伯氏復會於南陽舊廬冬又哭
季弟數年間亂離奔竄喪禍荐酷積瘁成疾幾不得
保丁亥筮仕為四山監役庚寅陞司宰主簿移監察
轉刑曹佐郎辛卯春臺 啓引 國制蔭職不中司
馬試者不許三曹郎之例論遞即 除木川縣監壬
辰冬以災傷罷戊戌拜瓦署別提俄遷司評出為平
陵察訪瓜歸壬寅拜祥雲察訪癸卯冬以曠官被逮
責配良才驛歲除宥還家食癸丑六月十日卒享年
七十葬于南陽治北泉谷丑坐原後以長孫澄貴
贈吏曹叅議公性忠厚有德器世稱長者晚通仕籍

棲屑於內外微官而止雖位不稱德壽考優閑而子
姓繁衍科慶重疊人謂為善之報配 贈淑夫人漢
陽趙氏應教贊之女萬曆丙午生壬戌歸于公庚寅
二月八日卒壽纔四十五墓在公墓後數步癸坐原
生六男一女男長昌夏以壽職嘉善 贈吏叅次昌
道出為伯父後次昌殷次昌周次昌漢文承旨季昌
東女婿全州李陽來生員側出一男昌基二女為縣
監慎聖源僉使許彬妾昌夏四子澄文右尹浩叅奉
瀆淨庶女二嫁沈友河李震英昌道四子二女子沈
涎文承旨混潛婿廣州李允文司諫全州李泰運昌

殷一子沂庶女一嫁黃瑾昌周一子沔昌漢三子三
女子澤消景婿草溪鄭規柱進士全州李茂年草溪
鄭熙世進士昌東一子二女子濟婿漢陽趙台明道
康金道彥縣監李陽來三子二女子祥麟聖麟瑞麟
進士壻順興安重元晉州柳光壽昌基一子賢暉內
外曾孫幾九十人今至五世六世而為五百餘人於
乎盛哉右尹公之仲子曰履文文掌令號古心齋文
章名世胤氏思正有通家之誼以狀授鼎福誌之義
不敢辭而為之銘曰

詩禮傳家孝悌行仁積善餘慶宜爾子孫振振兮

嘉善大夫行龍驤衛副護軍 贈吏曹叅判朴

公墓誌銘 並序

公諱昌夏字夏卿朴氏系出務安自高麗顯宗朝左
僕射暹始大顯簪紱傳世七百餘年號為名族曾祖
諱璘開城都事 贈吏曹判書祖諱應善號草亭以
經術聞 長陵初擢拜縣宰官至丹陽郡守 贈執
義考諱桂刑曹佐郎 贈吏曹叅議妣 贈淑夫人
漢陽趙氏應教贊之女公以天啓癸亥九月生姿稟
端粹治文學勅行誼人謂草亭公有孫庚寅丁內艱
癸丑遭外憂孝友出於天性其事親也盡志物之養

其居喪也中戚易之節奉祭祀誠敬純備凡百儀節率由草亭公舊典宿戒齋潔躬檢饌品至耄耆之年不懈如一每於喪餘之日羣弟來會罷祀後留至數日團歡湛樂連日夜無倦季弟早歿迎致孤寡率養而子女皆成婚嫁無異己出家法嚴正子孫侍側不敢惰慢雜戲常以勤學力行勿墜家風警勅之內外有別長幼有序嫡庶有分門庭之內肅雍如也少治舉業鬱有聲譽屢中大小解輒不利於會園永感後遂廢舉壬申年七十以從班推 恩陞通政拜僉樞素愛桐江江山之美構數椽屋而居之扁其堂曰余

樂日處其中揆討經禮壁揭古人格言而觀省之坐卧唯對湖山階庭列植花卉有時杖屨逍遙而樂之儵然有出塵之想知舊咸以抱器未售為歎而公則不屑也長於吟咏古律詩五六百篇藏于家公壽考康寧蘭玉盈庭科慶相繼再推 恩例爵至二品天之報施其在是歟壬午正月二十一日卒于江舍壽八十易箒前一日又陞嘉善付軍啣承 命于臯復之後告由題于旌某月日葬于廣州慶安胎峯里之石秀巖負申原丁未 贈吏曹叅判前後 恩例皆以右尹公顯也配 贈貞夫人全州李氏縣監縉之

女 太宗別子孝寧大君補之後生後公一年癸未
歸于公戊午八月二十八日卒壽五十五祔葬夫人
貞靜慈惠婦德克備皇考縣監公無子夫人孝養二
親誠孝隆摯于歸之後終始不怠令次子浩奉其廟
祀傳代如本宗而止內外宗黨莫不稱賞生四男長
澄文右尹次浩叅奏號坡隱有學行次瀆次淨號樂
在窩并通德郎側室二女嫁沈友河李震英澄有三
子二女子長震文壽職僉知次履文文掌令號古心
齋以文章名世次泰文通德郎女適廣州李錫仁郡
守延安李善迪庶子二曰謙文恒文庶女三嫁李善

學吳尚誠李萬長浩有一子六女子純文女適全州
李儀生員平康蔡哲胤東萊鄭琛進士驪州李朝煥
全州李齊益進士泗川睦會敬進士瀆有一子二女
子必文女適南陽洪奩萬延安李之曄淨有一子世
文壽僉知內外曾玄以下二百餘人今依古心齋公
胤思正氏狀謹次如右銘曰
源遠者流長根深者枝蕃德厚者福全孝悌之行詩
禮之傳公承之以不愆

嘉義大夫漢城府右尹朴公墓誌銘 並序

公諱澄字澄之朴氏系出務安高麗顯宗朝有佐僕

射諱暹入我朝有刑曹判書諱義龍跨歷二代世襲紳笏自判書七世至開城都事諱璘贈吏曹判書於公為高祖曾祖諱應善號草亭靖社初召用儒學特拜恩津縣監官終丹陽郡守贈執義祖諱桂刑曹佐郎贈吏曹叅議考諱昌夏壽職嘉善副護軍贈吏曹叅判妣贈貞夫人全州李氏縣監縉之女以長陵戊子五月二十六日生公于漢城之長興洞幼聰穎絕人治經業嘗試通讀于泮宮姜雪峯柏年時長國子大加稱賞辛酉擢科隸槐院乙丑由博士例陞典籍轉監察移刑曹佐郎丙寅兼

記事官歷騎省移全羅都事以守令應避遯丁卯除萬頃縣令戊辰以稅船遲發被逮責配衿川之盤乳驛己巳宥還庚午差備邊郎尋拜直講移金化縣監未赴而入薇垣為正言以親癯遯冬拜兵曹佐郎陞正郎辛未移慶尚都事不赴夏拜禮曹正郎移兵曹秋為湖南敬差官冬復為正言先是有安邦俊者牛溪成渾門客也私作偽書變換年月以鄭澈鍊獄之罪推諉於西厓柳相譁張幻弄無所不至一邊人至有享祀之舉纔因公議憤發上命撤其祠而爵秩猶存至是公論啓復列邦俊奸狀請追奪官爵

未幾遞復 除全羅都事壬申再 除掌令皆即遞
冬拜龍仁縣令數月病罷癸酉差宣惠即甲戌遞拜
高山察訪乙亥罷戊寅拜平安都事以叔父承旨公
見任江界呈遞俄 除順天府使以前任仍存遞己
卯 除右通禮庚辰移開城經歷又移泰安郡守辛
巳病罷壬午丁外艱丙戌拜鏡城判官丁亥冬病遞
庚寅 除蔚山府使壬辰罷歸己亥 肅廟入耆社
推 恩臣僚公以年七十陞通政秋拜刑曹叅議未
幾病遞庚子拜僉知辛丑遞壬寅拜工曹叅議移兵
曹叅知掌試監園冬遞尋拜判決事即遞癸卯拜兵

曹叅議再降叅知俄遞叅扶 杜勳原從乙巳罷勳
勳券還收丁未以年八十陞嘉善尋拜同知中樞府
事戊申移右尹即遞己酉以仲子 侍從 恩例加
嘉義辛亥正月二十日卒享年八十四用其年某月
葬于廣州慶安胎峯村先塋丁巳遷厝于同局面良
原公性質仁厚篤於孝友事親愛敬備至朝夕侍側
婉愉承順夙夜洞屬一事不敢自專壬午居憂年迫
六旬而戚易兼至不以衰老少殺母夫人不享遐齡
常以祿不逮養為恨每當喪餘之日哭泣哀慕感動
路人其於享先一遵先典豐殺隨家而務盡誠敬有

三弟篤於友愛晚雖異室同居一壑日與湛樂敦睦宗族一視無間前後作宰羣從弟侄迭來萃集衙退之後合席團歡情意藹然周窮恤貧隨力應副而無倦色窮交羸族以事來控委曲接應不彈煩擾子弟或從傍規諫則曰彼皆窮來求我何忍拒却苟無害於事理不妨於政法者從之何害視子孫過於慈愛未嘗以聲色呵責諄諄誨諭使之自悟下逮奴僕亦不以箠杖曰世道日下人心不古豈可責備於無識蠢隸乎只當羈縻善遇而已居官莅職秉公守法而亦不為反情矯激求名干譽之事清簡自持屢典州

郡而篋無餘衣厩無一騎座右無竒玩之具田園無尺寸之增其為郡邑治尚平易政先仁惠至於官簿會計不煩布籌而默運心計毫忽不差猾胥畏戢不敢容奸公雅性簡素恬於進取宦道陞遷一任儻來而惟義之比已已以後親朋滿朝若能稍涉時論則榮途在即而一味退縮耻與相昵棲遑局外名位蹭蹬及夫時象一變世念都灰屏居江干守拙固窮間以郡紱州符往來北塞南徼而已辛丑新政坐於銓官之昏忘見漏銀臺之擬已酉恩資由於黨人之忌伎竟阻耆社之班此皆有關於世道人心而雅懷

謙挹不少介意所謂清不絕俗和不同流者矣配
贈貞夫人泗川睦氏牧使林馨之女生先公一歲年
四十六卒窆于廣州先塋丁巳移葬祔左夫人有婦
德能幹事宗黨稱之生三男二女男長震文壽職僉
樞次履文號古心齋以文學稱文掌令次泰文通德
郎女長適廣州李錫仁郡守次適延安李善迪側室
二子三女子曰謙文恒文婿曰李善學吳尚誠李萬
長僉樞無后掌令一子三女子思正出系僉樞後婿
李德胄李載望叅奉趙恕通德二女婿李世岳安載
厚郡守一子一女子進士光蘭婿生員洪日煥李善

迪無后謙文一子思安二女嫁蔡膺說洪夏臣恒文
一女嫁朴羅甲李善學一子世俊一女嫁朴永煦吳
尚誠系子章運李萬長一女嫁金 內外曾玄七
十餘人銘曰

君子之道簡靜為基簡不絕物靜能自持相彼世人
胡為奔騖逞智聘私恬不覺悟有美朴公質稟溫惠
襲訓家庭敦行孝悌雖以科進意在謙挹黨人進退
我心常慚入臺出宰惟職是務斥奸辭嚴恤民恩厚
不激而訐不靡而隨悃愾無華惟義之為位局于時
德施未普嗇彼豐此天以壽報廣陵之阡碩人攸宅

我銘不諛敬奠窀穸

通德即朴公墓誌銘並序

公諱淨字淨吾姓朴氏務安人高麗顯宗朝有尚書
左僕射諱暹以勳閎著入本朝有刑曹判書諱義
龍自麗以後七百有餘年而簪紱相傳為東韓名族
曾祖諱應善號草亭以學行薦官丹陽郡守 贈執
義祖諱桂刑曹佐郎 贈吏曹參議考諱昌夏嘉善
副護軍 贈吏曹參判妣 贈貞夫人全州李氏長
水縣監諱縉之女公生于詩禮之家早襲庭訓而姿
質溫恭制行端飭平居無疾言遽色年十八丁內艱

哀毀過制幾不勝喪遂抱終身之疾公少治舉業嘗
再發解司馬試竟屈公車而黨人專擅世道難與俯
仰已卯以後稟于家庭遂廢舉時公年未四十矣抱
利器而不苟售非大勇能如是乎壬午丁外憂戚易
俱至哭奠之暇與仲兄坡隱先生浩講論經禮墳簞
相磨服闋就僧舍讀論語心經近思錄孜孜不懈要
求聖賢本旨嘗論孟子道性善章曰人性皆善堯舜
與我一也我若為善善斯至矣何憚而不為手書程
朱論學要語于曆書朝夕觀省以自警焉又論退溪
先生以人心為七情道心為四端與中庸序同則二

者之為七情四端固也又曰朱子云仁存諸心性之
所以為體也義制夫事性之所以為用也然以性言
之則皆體也以情言之則皆用也以陰陽言之則義
體仁用也以存心制事言之則仁體義用也公自少
專精禮書嘗在甥館值外舅許公之喪公相禮儀節
一遵觀雪遺規至於浚衣幅巾之制手自裁度無少
僭違見者皆稱其年少習禮李叅判世弼居桐江素
習禮公以其里閭先進往復答問李公亟稱之叔父
承旨公諱昌漢晚治禮書公稟質磨礱亦多又與仲
兄及從兄舍人公澁論大學格致說二公始或岐貳

末乃與公歸一工夫之精覈篤實有如此者公家貧
無以自存丁酉移寓原州贅鄉治一室壁揭論語飯
蔬食飲水章因自號樂在窩玉洞李公淑與其季星
湖先生灑來訪歸語人曰朴某徒容溫粹與坡隱難
兄難弟云翌年正月寢疾疾革誦明道陋巷一生顏
氏樂清風千古伯夷貧之句曰善哉因令胤子執筆
口呼曰余之死於此命也蓋恨物於客土也命治喪
具戒子若婦曰九喪祭必稱家務從誠潔可矣命正
席揮婦人出曰男子不絕於婦人之手禮也死生之
際守正不亂平日所養可知也已公生于 顯宗辛

丑五月二十九日距卒 肅宗戊戌正月十日壽五十八三月返觀葬于舊宅數里許即果川治北銅雀津南梨樹谷負壬之原也配陽川許氏宣教郎翌女掌令觀雪先生厚孫生與公同年 英廟丙辰四月六日卒壽七十六墓在瑞山冬音巖里某坐原生一男世文壽職僉樞初娶安東權後經女生一子思儻再娶韓山李聃年女生二子一女子思任思儻婿韓欽思儻一子處五思任無后思儻二子二女皆幼韓無后處五二子一女子長箕鎮餘幼銘曰

詩禮之訓爰自草亭或顯或隱固不服行公又挺特

始于妙齡同堂之內金季玉昆蘭本有根醴豈無源
瞻彼幽宅梨樹之阡

折衝將軍僉知中樞府事朴公墓誌銘 並序

謹按朴氏系出務安遠有譜牒歷高麗入本 朝冠冕相承七百餘年而至草亭先生諱應善以儒術名靖社初擢之布衣中直拜縣宰官丹陽郡守 贈執義寔公高祖曾祖諱桂刑曹佐郎 贈吏曹叅議祖諱昌夏嘉善副護軍 贈吏曹叅判考諱澄漢城右尹妣 贈貞夫人泗川睦氏牧使林馨之女以我崇陵庚戌十月生公公諱震文字啓明雅性孝友

川者集 卷之二十一 二十三
志操謹潔事親左右就養恪勤子職惟以順適親心
為意壬申丁內艱執制如禮辛亥右尹公捐館公年
踰六旬而不脫衰經不廢哭泣凡節一如前喪不以
老而少衰為祭祀之儀一遵先典粢盛籩豆之實先
事措辦未嘗有窘乏假貸之患與二弟一姊友愛甚
至一妹纔嫁無后而天不忍歸主于舅家祭之三十
年而後所後子迎還析產自取硯確老羸而歸其優
者於諸房曰余以宗家猶有祭田諸房窮乏何以聊
生逮至晚年連遭同氣之戚孔懷痛甚若不自全世
業清貧右尹公屢典州郡而廉白自勵田園無尺寸

之增歲入常縮公節用謹費量入為出大小調度咸
有條理是以雖饘粥頻設而無庚癸之呼弟兄李公
錫仁通判完山時送獻鬢笠于右尹公右尹公以其
華美也未嘗一著匣箴之有年後姊氏居窳公以其
笠歸之助其艱乏此雖微事亦可以觀公之行矣甲
子自江僑來寓胎峯楸下己巳 朝家用優老之典
陞通政送西付折衝副護軍辛未閏五月二十三日
卒享年八十二是年七月拜僉知蓋銓官未聞喪故
而然也遂告由而易旌云某月某日葬于廣州慶安
面胎峯石秀巖坤坐之原前配 贈淑夫人豐山洪

氏持平重鼎之女慕堂履祥之五世孫也生與公同年丙寅歸于公壬寅七月二十八日卒權葬于胎峯先塋辛未移厝合窆祔右夫人柔婉有婦德孝於父母而移于舅姑順夫子睦娣姒閨門之內人無間言後配淑夫人長興高氏學生世貞之女壬辰殉節臣學諭 贈領相毅烈公因厚之玄孫叅議 贈貳相忠烈公霽峯敬命之五世孫也生于我 明陵己卯癸卯歸于公丙戌正月十五日卒于天安庄舍一年權厝丁亥春返柩合葬祔左夫人性通敏勤儉孝敬慈惠閨儀不忒紡績等事必兼人工治家四十年大

小吉凶之需莫非自手中出身後衣衾之屬躬自措辦手自裁縫藏于篋笥一無所遺宗黨鄉鄰莫不曰賢夫人前夫人年過無子女取公仲氏掌令公之子思正為後後夫人亦無子女思正通德即有二子二女子處順處顯女長適廣州安鼎祿即鼎福之弟也次適安東金垓處順無子處顯三子二女并幼鼎祿三子三女子景淵景夏一幼女適昌寧成孝詰清州韓秀運廣州李命億垓系子世箕鼎福於公家有瓜葛之誼而幸同鄉井頻納床下之拜每見公清脩苦節不覺悔吝自消記昔戊辰冬鼎福往候公通德君

適不在家公整衣冠携杖而出遂拜于路左請其所
之盖将省墓矣時公年幾八十而積雪未消鼎福悶
其陪涉之無人也乃後而行恭埃于山下公歷省而
還至今思之若昨日事通德君屬銘于鼎福安敢以
不文辭銘曰

綿城賢胄克紹先德孝友為政敬謹自勅福善之報
晚享天爵二配賢淑儼美匹休壺政無違夫子忘憂
同阡并祔天作好逌潜光隱德誰能發揚我銘以文
用誌幽堂

通訓大夫行司憲府掌令知製 教古心齋朴

先生墓誌銘 並序

公諱履文字仲禮朴氏出務安族大而舊自麗及本
朝代有顯仕高祖諱應善號草亭丹陽郡守以經
術名後 贈執義曾祖諱桂刑曹佐郎 贈吏曹叅
議祖諱昌夏嘉善副護軍 贈吏曹叅判考諱澄右
尹妣 贈貞夫人泗川睦氏牧使林馨之女公生于
顯廟癸丑八月九日穎秀異凡兒幼而就學誦讀
不倦甫成童已有聲譽二十遭太夫人憂不脫衰經
不食菜醬血泣終三年過毀成疾服闋益自勵為學
聞太學士霞溪權先生愈退老于禮山以古文訓後

進從遊八年益聞其所不聞大肆力於文章藝業日
進權先生亟稱之曰斯文之托在此矣己卯補成均
生員辛丑中增廣文科選槐院癸卯以年五十例陞
叅拜典籍遷監察甲辰除砥平縣監未幾公有疾
而時景廟賓天公驚悼添瓴屢辭靳許適有營帖
使助亞使晬宴縣吏以例告公命置之遂有推論之
舉公乃引咎投狀曰當玄宮在殯之日非人臣酣
樂之時巡使摧謝而竟置下考曰為官五朔民不見
面蓋托公病而修前憾也歸時吏告火粟五十包當
歸私用公曰於汝色素餐可愧何用此為命置簿後

有繡衣舉此褒獎云丁未除兵曹佐郎兼記事官
己酉拜正言先是賊臣任徵夏誣辱先王以一亂
之語而結之以撥亂反正又曰禮樂征伐不得自天
子出其避辭尤凶悖至曰最初備忘出於尚儉之手
又曰尚儉死後安知又有尚儉乎時縉紳請討臺省
論執竟允正刑之啓而徵夏頑不納供已數歲
至是公草啓請正法未及上以在外遞冬又拜正
言違召罷庚戌差實錄廳兼史數月呈遞辛亥
遭右尹公憂守制如前喪丁巳被抄知製教三字
啣素稱清選世多攀援而得者公簡靖自守而主選

者亦時人也聲聞不相及人謂公議有不泯者尋拜掌令以親山緬禮陳疏請暇無附所懷言君子曰量而後入不入而後量今臣俯而量乎身則學識蔑裂既不足以獻可替否言議異懦又不足以繩愆糾謬仰而量乎時則蕩平之治終歸文飾綜覈之政徒益煩瑣踈遯愚忠憂歎而已實無可奈何柔佞之風大小靡然傾軋之習彼此一套拙訥畸踪自靖而已亦無可奈何前有二不足以後有二無奈何而徒然受耳目之寄與俗浮沉臣雖無狀亦不能為此承批過葬歸即封疏乞逋且尾陳勉戒有若干條目曰敦

聖學以立大本曰擇正士以輔元良曰建皇極以致蕩平曰明大義以定國是曰簡辭令毋使中外窺淺淡曰摠權綱毋令臣下玩威福曰毋專寵於便捷巧令之小才曰毋受欺於柔佞迎合之似忠上優納竟以違召罷冬又拜掌令因停論事罷職不叙公釋褐之歲當景廟初元朝著一新稍當有為之機而少論當局操切猜疑視往時殆有甚焉且十數年來清議漸泯鑽穴穿運攀援幽隱親知後進中平日知名者往往喪失舊步一切為容身趨利之計公知時人之不可與事君世道之不可以有為絕意仕宦

川者集卷三十一
二
儼舍江郊或就煖僧寺日與門徒講討舊典有終焉
之志立朝二十年歷計仕宦日月不滿二暮癸亥二
月十三日易筭壽七十一訃聞有識莫不嗟悼曰從
此斯文喪矣正論熄矣四月二十六日葬于廣州慶
安胎峯里負坤原從先兆也公天稟甚高清明溫粹
處心行事要以古人為準則其為文亦根於六經而
意匠墨尺取裁于先秦兩漢得於斑椽者為多自以
下不論也嘗作古心子序以見志畧曰生於今志於
古其身今人其心古人遂自號古心子為之贊曰其
身畸然其心整然其今之人耶其古之人耶其行踈

其言亢其古之古之人古之人而言不能顧行者耶
寄聲利於身之外忘是非於心之中非遁世遺俗獨
立天地東者耶室數椽蕭以寐書萬軸充其間以翹
神於葛天氏之風仍名其居曰古心齋此其胸中真
趣不可與俗子道也平生手不釋卷殆忘寢食經書
大者千遍小者三五百遍至如歷代之史百家之書
靡不兼摠條貫嘗曰古人文愈讀愈新老來倍覺有
味其於性命理氣之說典禮質文之宜亦皆溯源而
挈綱曰人之有道也太上德性其次問學宋以後諸
先生講明得盡要在討論而體行之而已尤篤於內

行事親無違志與伯氏白首同居墳麓湛樂一姊一弟在一息二息之地便信絡續庶妹早寡無子時時挈歸而率育之庶弟未成人者亦教養而婚娶之有一子歸于伯氏或勸立後則曰無子而有子有子而無子皆非常理兄弟共一子何妨於義子若有二子以次孫承祀否則班祔可也待宗族接賓朋一以誠信不設畦畛各得其歡心後進有樞衣請教者雅懷謙挹雖不以師道自居而隨才施教誘掖責勉以此從遊之士莫不激昂以名節自勵每日早起盥洗整攝衣冠終日穆然端坐居家內外斬斬教子女御僮

僕恩義兼至家素清貧或值屢空而處之晏如也性喜飲酒或有不平事或親友造訪引滿歡洽而不及於亂公堂弟叅奉趾文序公稿有曰我邦古文倡於東臯生而備於孔巖叟叟死無傳焉吾家古心子接二老之統而詩過之誠集我東之大成哉公女婿莘亭李德胄祭公文有曰自序之言眇視千秋點也潛也携手遨遊居簡之簡近仁之訥左丘之耻同科并哲篤孝悌本後性命舌游夏之學摠只是實跡寄朝端情同綺黃身處城市境若柴桑公惟好古於文最深下師東京宋氏則禁往者崔許寔關其門霞翁繼

起公實偕騫馬史韓碑不命不求蘊而終古戚我青
丘人饜膏粱我飫書詩味無味樂而忘飢二公皆
近世莊士而其文章節行信於人宜其言之可徵也
鼎福王考兩棄翁與公同門受業王考嘗道權先生
之言曰後輩之名必藉先達推獎而成余少為文眉
翁白湖諸公稱賞延譽遂以文名今朴某之文可謂
青出於藍而獨我知之他無援藉之所是可歎也鼎
福承聞于家庭者如此故亦以附記于二公之後配
韓山李氏縣監雲根之女領議政鵝溪山海之五世
孫大君師傅延安李禔之外孫生與公同歲後公四

年丙寅三月二十日卒壽七十四祔葬公墓右淑人
性行徽柔婦德克備生一子三女子思正通德即出
系伯氏僉知公後女長適全州李德胄次適驪州李
載望季適漢陽趙恕叅奉思正二子二女子處順處
顯女長適廣州安鼎祿即鼎福之弟次適安東金垿
李德胄一子一女子磐女適廣州李東著李載望系
子是鑑趙恕三子鼎玉鼎基鼎說內外曾孫若干人
銘曰

其行高而潔其志確而貞其文簡而宏君子之德百
世可程又曰

世運回幹淳漓撲散淑慝難分賢愚同貫媒榮悞進
惟利是趨達人視之蟻聚何殊怒讐喜狎黨同伐異
貞士視之懼或浼已公抱利器公有偉才擡蓮摘桂
一任儻來迹孤朝端心懷遐舉我自有樂與俗殊軌
終南之麓桐江之濱隨寓安排遠彼蠶塵古心真純
古貌清瑩篋富古文案堆古經與古人稽非今士擬
設為文章理到詞馳班髓社骨周情孔思於乎我公
百世之師

僉知中樞府事朴公墓誌銘

並序

綿城朴氏為東方著姓肇顯於高麗至 聖代簪紱

相傳七百餘年 仁祖朝有丹陽郡守諱應善以經
術薦用號草亭先生於公為高祖自後子姓多世其
學以文行名時人稱之為禮家曾祖諱桂刑曹佐郎
贈吏曹叅議祖諱昌夏壽爵嘉善 贈吏曹叅判
考諱淨通德即號樂在窩隱德不仕妣陽川許氏宣
教即翼女遜溪先生厚孫也公諱世文字繼輝幼襲
詩禮之訓制行端飭事親無違志疾則致其憂至於
血指祭先盡其誠敬睦嫺宗黨人無間言少治舉子
業中歲棄之善草隸酷好看篆模倣逼真亦不屑於
夸衒性醇謹安分守拙厄窮甚而操履愈堅宗侄家

川香集 卷二十二
三十一
僑居天牙之間公自海美挈眷移就相依雖在耄耄之年精力康旺先廟有事齋沐與祭朔望叅謁寒暑不拘尊祖敬宗之義人皆歎服 英宗末屢行優老之典庚寅授朝奉大夫癸巳陞通政仍付西樞是歲九月初一日卒于牙山之市浦寓舍距其生辛未八十三年矣公前配 贈淑夫人安東權後經女長公一歲生一子卒於甲午二月初四日葬于廣州慶安面胎峯里先塋側西坐原後配 贈淑夫人韓山李聃年女少公三歲有淑行生二子一女卒於癸未六月十七日新卜宅兆于天安茅山面市浦里亥坐原

及公卒合窆于墓右男長思儻次思任次思儻劬書勅行有士友譽女適韓鄴思儻一子處五思任無后思儻二子二女皆幼思儻思任皆先公歿韓鄴無后處五生二子一女子長箕鎮餘幼銘曰

綿城胤胄世烜赫跨歷兩代簪纓續公趾其美韞于積混跡農圃聊而樂自天申佑餉壽爵有子克家慶遠毓鬱鬱市浦卜新宅敬鐫幽堂昭潛德

有明朝鮮國右資成兵曹判書兼判義禁府事

琴軒李先墓誌銘

並序

公諱長坤字希剛號琴軒碧珍人已卯八賢之一新

羅末有碧珍將軍李忽言顯于麗初公其後也自是
世襲簪紱七世祖堅幹官進賢館大提學三世至希
慶官都元帥寔公之高祖曾祖諱慎之 贈吏判祖
諱好謙知興海郡事考諱承彥遊佔畢齋金先生之
門沉弘有量淹貫經史薦官漢城兼叅軍 贈左贊
成娶孝寧大君孫吏曹叅判春陽君練之女以成化
甲午生公公生有俊才及長師事寒暄金先生乙卯
魁生員遊太學與李陰崖耜相厚善壬戌登第燕山
甲子以弘文校理竄巨濟懼禍越海逃竄匿於咸興
楊水尺家為其婿怠於役作號為懶婿居三年 中

廟改玉復 除校理揭榜搜訪榜文到咸興公出應
命一府大驚遂歷揚清顯舉朝屬目乙亥 章敬
王后昇遐金冲菴淨朴訥齋祥抗疏請復廢 妃慎
氏位號大諫李荇大憲權敏手指為邪論擬死罪事
幾不測左相鄭公光弼庭請救解杖贖徒配是冬趙
靜菴先生拜正言請罷荇等職以開言路從之先是
應教李彥浩右荇敏手至是公為大憲與新大諫慕
齋金公安國右靜菴掌令柳溥金希壽欲同彥浩之
議公反覆曉諭竟不相合遂詣闕各陳所懷 命遞
公及金公因 命溥等行職自是廷議角立互相攻

斥終為士禍張本已卯北虜梗化公時為右贊成
上特命為北道節度使吏判申錫 啓曰貳公重地
不宜久曠 上曰余欲以重臣鎮之卿言亦當 允
之時靜菴當國善類登庸 上亦銳意為治南袞沈
貞之徒皆在罷散與洪景舟等協謀交構十一月景
舟稱密旨言于被屈宰相同害黨人與袞貞定謀而
舉事之時無兵判則不能號令於衛士時公為兵判
兼判義祭袞瞰公之無三往投刺十五日夕袞馳書
曰國有大事走馬入來公家在興仁門外蒼黃馳到
袞曰有密旨洪判書待命神武門矣袞退坐不入公

隨景舟金銓高荆山入闕都摠管沈貞叅知成雲亦
自職所來會坐閣門外請 上御便殿景舟以靜菴
罪目入 啓且令內庫戎器陳列陛前將欲拿致格
殺乃入 啓曰事急請速命囚入直近侍於是政院
始覺之直宿承旨尹自任等詣闕進問曰宰相入闕
使政院不知可乎左右相目不語公獨且立且坐欲
言而不敢發俄而內官出召成雲趨入即出以小
紙授公曰 御筆也此人等亟下獄以公判義禁也
公以授都事黃世獻送承旨尹自任孔瑞麟注書安
珽檢閱李構應教竒遵修撰沈達源皆下獄漏鼓三

下矣於是閤門諸宰皆入以危言恐動之勸 上速
令逮捕黨人拿致誅之公始知當夜格殺之議愕然
進 啓曰人君不可於昏夜加刑有若行盜賊之謀
亦不可諱首相而行大事反覆力諫景舟欲啓 上
請速決或作起動之勢公輒揮手却之曰公何為若
是使不得離席以售其奸謀 天威少霽乃 命招
領議政鄭光弼由是事得寬緩領相請推鞠宐罪公
與金銓洪淑臺諫承旨同推入啓 命以時推照律
趙光祖金淨金湜金球四人擬死律領相與左相安
瑋面對泣諫乃 命減死杖配未幾公辭遞禁府臺

諫論公前日推鞠不嚴致罪人呼字呼名請罷退寓
驪州之寓灣與金慕齋申企齋光漢常會神勒寺唱
酬羣小以為誹訕 朝廷公遂還昌寧舊居優游以
卒墓在縣北合山先塋子坐原後昌之人士建祠燕
巖享公父子配清州慶氏郡守祥之女無后庶子德
南女適金生德南子忠恕金生子一陽公風神魁偉
才兼文武早遊先正之門及其立朝與陰厓慕齋權
冲齋撥道義交磨權公嘗使其子受春秋於公則公
之深於經學可知而方已卯羣賢彙進之際公位貳
公判兵務則其為諸公之所倚毗亦可知也北門夜

啓禍色滔天而公挺身獨諫卒能折奸謀召首相事
得少緩八賢之目寔公議之所歸也今距公之世二
百五十六年而後嗣不繼遺文散佚其平日言行立
朝章奏皆湮沒而無傳可勝惜哉大山李公象靖既
為之狀又撰碑銘而竈文有缺山長安佐郎景漸專
人走書以公旁孫瑞龍之意請誌于鼎福鼎福素不
文且在衰癯濱死之中有何精力可以應命於倉卒
一日之間哉惟其幽堂之文異于墓道之顯刻記其
事足矣今依李公所撰兼附一二聞見謹序如右銘
曰

於休先生天賦全才際遇 聖明若將有為嗚呼已
卯治亂之括治化未隆亂機斯發北門風雨羣賢駢
首刀鋸在前鼎鑊在後滿朝悼慄孰敢嬰鱗公於是
時奮不顧身公之忠直天監孔燭坐是廢斥反我初
服長才偉器蘊于丘樊優哉游哉樂此餘年多士膠
享百世矜式藿澗泠泠燕巖翼翼千古芳名永流無
疆我銘不諛敬奠幽堂

淑人全氏墓誌 丙申

昌寧孫佐郎錫謨有賢配曰淑人全氏既沒將葬屬
其友安君景漸狀其行請誌於鼎福曰閨闈之行雖

川者集卷二十二
不可宣揚於外而不忍有沒沒者欲得墓記以詔我
穉昧鼎福不能辭謹按其狀淑人自幼婉順沉默貞
靜自守其在室處父母兄弟之間無違行年十九歸
孫氏婦道甚備宗黨鄉里莫不稱其德皇舅嘉悅之
常曰此吾家福婦也乙亥丁皇姑憂淑人甚慟之喪
庀之節皆出自機杼戚易俱盡仍謂孫君曰生不致
養奄罹大故目今奉侍偏親當異於具慶之日殫竭
心慮必有酒肉惟以養志為事翌年皇舅又見背哀
痛切至勿悔之節一視前喪撫養弟妹逾於平日及
其婚嫁聘幣粧奩竭力資辦曰豈可使孤露之弟妹

益切感慕之懷也蓋其友孝天植然也孫君自少治
舉業同研賓交常多而閨門之內不聞有一聲謔饌
供饋頗有剪髻之風孫君之釋褐榮還也一村士女
全至聳觀淑人獨超然若無見不出中門人皆異之
孫君與孀嫂寡妹同居又畜小室剛柔異品酸醎不
齊至誠接遇咸得其心淑人其可謂女而士行者矣
淑人生于 景廟辛丑正月二十九日歿于 英宗
丙申三月二十三日得年五十六生一子一女男日
徵以明經名女適張胤炯葬于某山某坐之原全氏
系出竺山曾祖某祖某考聖任妣密陽朴氏萬基之

女安君謹拙人宜其言之有徵今節錄而為之記

宜寧南氏墓誌銘 丙申

歲乙未麻疹遍域中孤青居士南君必復喪其賢女為李氏婦之未歸者居士哭之慟憐其志行之泯也走書屬余誌其墓居士宜寧世族也 國初有諱在開國功臣領議政謚忠景公八世而有諱以雄佐仁祖策振武勳官左議政封春城府院君居士即其承祀耳孫也娶全州李氏以 英宗丁丑生女于漢師後移公州女自幼婉順仁恕篤於孝友母素患心腹兄泳善病病必左右扶將粥飯藥餌親自炒嚮衣

不解帶疾已而猶不懈祭祀之時執籩豆具饌羞達曉不寐以卒事敦睦宗族不以戚疎有厚薄奩箴無一私儲每當授衣之時代長者執針線必先人而後已以是家人上下內外親戚莫不稱之曰賢女年十八歸于恭谷李寅運李亦廣州著姓也其先有諱集號遁村麗末名人石潭潤雨監司元祿其七世五世祖也父東洙中世移嶺南族大而盛嶺人之稱華族必曰石田之李石田即其所居里名也翌年十月女與兄泳同時染疹而已若不病也盡心救療及其疾甚難強而後始卧而病已不可為矣遂盡索夫家書

札點閱藏置曰既歸於人不識夫家門庭是可恨也
且謂其父母曰一女子之死不關門戶願勿悲毀言
已而歿即是月二十三日時年十九禮女未廟見而
死則葬于女氏之黨而夫家哀其無后而死也迎喪
以歸葬焉順人情而不悖于義實禮之所貴也遂為
之銘曰

李氏世葬珠峯麓負乾之原女士宅

順菴先生文集卷之二十二

順菴先生文集卷之二十三

墓誌

成均進士獨醒齋黃公墓誌銘

並序
己亥

公諱最字樂元黃氏出昌原高麗侍中忠俊其遠祖
也入本朝有義原君居正簪組相繼七世至戶曹
叅判璫又二世至洪川縣監諱灑文學氣節為人士
矜式於公為高祖曾祖諱汝耆丙子虜變倡義江都
奉母夫人沈氏闔門殉節旋間贈司憲府持平祖
諱儀虜變後隱居坐不向燕號後村逸人考諱遇聖
遵家訓兄弟五人不應舉妣咸平李氏直長延華之

女公以 明陵庚申閏八月二十三日生幼俊偉有器度先進皆以遠到期之及長自力為學程文各體皆操筆立就場屋之士咸推重焉屢舉不中 英宗乙巳始登進士竟未大闡君子曰命也庚午九月二十三日卒于正寢享年七十一葬于陽川縣南山里後遂移窆于富平府桂陽山之東陌峴丁坐原公性孝友事親無違年甫冠母夫人患疽久未瘥公吮之三年不怠及丁憂哀毀踰節戊戌夏丁外艱亦如之繼妣鄭夫人人性嚴無少貸公承事洞屬愛敬備至一弟三妹皆繼妣出也撫愛教誨咸至成立奉鄭夫人

母李氏於家如事鄭夫人喪葬儀物備無憾於鄭夫人志鄭夫人為之感悅京鄉士林列公行誼為登聞計公聞之曰是重吾不孝也乃力止而止之平生喜賓客戶外之屨日盈公胸懷坦夷談諧酬酢戚踈輕重率中規度其於交際恩義兼至久而無甘壞朋舊有死而無依者恤其家遠方之士遊洛下而無寄者延于館或旅死而未歸葬則營辦而資之晚來訓誨後進誘掖多術卒之成就者眾遠近從學者咸萃必以志行為先而文藝為餘事公雅有抱負晚無所成雖處於浮沉末俗而立志牢確有萬夫難奪之操

當黨議橫流士趨失正之時刊方逐圓陰陽其行者
滔滔然也公視若浼已輒唾罵之一要宰冒山林名
辭位邀寵章甫干進輩將治疏請 敦召冒錄公之
子疏中公嚴辭斥之亟令割其名議遂沮繼而臺臣
承風旨上章為言臺臣公之素熟者貽書責以不識
人間有廉耻字由是人或嫉之而不少撓也其為學
勤苦刻厲經書正文讀皆千遍尤致力於書經曰聖
賢之文斤兩重而意味深不可乍看旋讀而知也讀
必貫透而後已門人質問經義則發明奧旨旁証小
註某氏釋在弟幾行不開卷而不錯一字至於百家

之書無不淹通若陰氏韻府類書之微瑣者猶能舉
輒成誦嘗言吾於文非以才也勤以得之少時讀書
燃繩照字習書折柳為筆其筆與繩晚歲猶存公之
書法長於蜀體八試場必躬自寫卷人以不合時樣
尤之公曰盡吾技而已借書僥倖吾不為也居家尚
儉素在鄉庄斗屋土床麤飯菜羹安之若性日用器
皿多範土制之什物華鮮者不接於目嘗曰人生寅
凡事之初始在寅必昧爽而興勤其所業可也及歿
遠近知識嗟悼曰從此士林之正論熄矣公所著獨
醒齋集若干卷孟子不動心章附說雪窓雜識等皆

其平日受用也配孺人廣州安氏考進士諱瑞采於鼎福為從祖孺人柔嘉靜重喜愠不形事舅姑殫其誠事所天盡其敬閨內整肅終日治事聲音不聞於外內外宗族莫不曰賢庚午喪變以後家業剝落無以為生而公季氏欲得某田孺人成券給之不少恠人以為難少公一歲後公七年丙子卒與公合葬生一子一女子幼名老郎有才藝未成童夭取從弟昱子以坤為後砥礪文學將有成不幸先公歿有二男德壹德吉女適沈海普有三男一女男長連漢文科承文正字早天次通漢季達漢文科今正言女適趙

守簡公嘗狀我王考行曰知公者莫如我至比於元祐完人我先人亦嘗曰知某氏者莫如我大冬嚴雪挺然獨秀者某氏為然鼎福亦被公獎勉期許者不少公處我三世契分特厚公孫德壹持狀文來請誌義不敢辭撰次如右而老病昏謬不能侔狀潛德之萬一俯仰今昔不覺掩泣謹為之銘曰

於休黃公稟質挺特孝友天至詩書業篤範世其行濟時其學期舛千一運丁百六黨習敗俗岐路多錯莊言正色壬士側目確然有守卷懷自樂巴陵舊庄萬峴家塾乃耕乃耘乃訓乃迪優遊卒歲克全令德

爰有賢配溫惠貞淑宗黨視效閨儀整肅有赫斯丘
實惟玄宅百世有徵視此幽刻

魯野黃君用汝墓誌銘

並序
己亥

庚午夏余以沁 殿卽解直過君於巴陵田舍見君
容貌辭氣異昔時余戲謂曰君欲為學乎君答曰學
以為已其有別法乎余心竒之留宿講為學次第而
歸後數月而聞君訃噫噫痛哉君諱以坤字用汝黃
氏貫昌原 國初有義原君居正其遠祖也曾祖諱
儀祖諱遇聖考進士諱最於余為從姑夫無嗣取從
弟昱子為後卽君是也君以 明陵己亥八月十五

日生自幼性愿謹樸直惟長者言是信是聽八歲入
學姿性鈍訥進士公教督嚴終日不怠而不能成誦
始授少微史既畢反覆熟讀通透而後及于他書經
書子集皆用此法無一時之懈受讀之際榎楚屢加
而君安意承順怡愉之色有不可掩所後妣安夫人
每稱之曰此兒孝性天植然也年踰弱冠博通諸書
嘗入庠試題出思傳同試者不能記其解君并小註
誦說之無遺人咸歎服曰所謂魯而得之者此之謂
也君讀書忽慨悟曰聖賢立言非為人作文應舉地
將欲以明此道也鄰丈李上舍齊益先達士也君袖

心經往問之多發奧義李公嗟賞之庚午春往拜于星湖李先生先生與之講學喜曰言言皆篤學實踐底意吾黨乃有人矣君於座右書慎獨二字以自警晨昏定省之餘終日端坐玩繹經傳有時默契潛思如有所得焉觀於自警文論學諸書槩知其造詣矣是夏得竒疾自鄉庄輿歸萬峴京第而歿即庚午七月二十六日也得年三十二嗚呼惜哉君之喪進士公哭之慟曰吾兒好禮當以禮服斂製深衣用之葬于陽川縣南山後移窆于富平府桂陽山之東丁坐原前娶完山李靖胤之女無子女後娶白川趙景采

女生二子曰德壹德吉并以文行補銘曰

人之於學有志為難既有志矣成之為難志在人成在天如君者可謂盡人而不盡于天悲夫

處士南君墓誌銘

並序
庚子

鼎福平生有畏友南伯瞻其人也自幼童至老大相逢敬而愛之未嘗加以狎昵針芥之契莫逆也惜其讀書躬行四十有餘年竟以窮沒天道於是乎難定矣其孤允協允性狀其行款余而言曰知先子莫如吾丈宜有以文之余以不文辭旋思之事在記實而已亦何用文為遂受而讀之君諱赫伯瞻其字也

出宜寧自高麗密直副使君甫始歷四世有諱在佐我太祖策開國勳位上相謚忠景孫諱智左相謚忠簡德業著國乘又四世有諱應雲吏曹叅判號菊窓於君為七世祖歷世簪紳東方名閥必稱宜寧之南曾祖大興郡守諱重維祖生負諱壽喬考諱夏永有文行不幸早世妣全州李氏鼎揆之女派出太宗別子孝寧大君補宣祖名臣吏曹叅判損菴拭之五世孫也君以明陵辛卯二月十八日生于公州葛山之寓舍英宗乙亥七月一日終得年四十五君六歲而孤哀慕哭泣如成人人皆稱曰古之

孝子也李夫人賢有婦道兼通書史以寓鄉質買非教子之所挈歸振威之桐泉舊庄課授小學不煩呵責而誦讀不掇至嘉言善行必鼓舞而若將行之伯父桐巢公竒愛之曰果是賢母有佳子甫成童文理驟進及長沉潛乎經史出入乎子集為文章瞻敏條暢詞理燦然至於代人書牘祭誄之文輕重踈密各得其宜道其所欲言而未能者彌正平不是過也君才如是而竟屈公車則羅隱之不第林椿之阮窟自古君子謂之命也君孝友行於家而忠信著於鄉事大夫人日侍其側怡聲婉容左右承奉無一毫勉

川者集卷二十三
強意若承教訓終身佩服及丁憂哀毀踰節三年之內不脫衰經不離廬次撰輯夫人言行受誌於桐巢公而歲之與弟詰友愛甚隆未嘗須臾相離至於衣服飲食之節不忍先之人之戒子弟以孝友者必曰以某為法閨門之內禮度斬斬自燕爾之初相敬如賓久而益謹季父潛翁公曰吾家之冀缺也遇忌日前期月餘已有悽愴之色不妄言笑至齋日追慕皇皇祭需雖稱家有無而必先周旋竭其心力常戎家人曰神道潔淨而誠之所存神斯在焉雖二簋之享當盡誠潔不必多品多品恐欠潔也祭饌餘物未祭

之前不敢近口至穉孩無知者使不先嘗在外而遇新物之未薦者不忍先食嘗過宿知舊家適有忌祀君達曉整坐以俟事畢其事神之敬謹不以外內而有間也承事諸父與羣從處真情藹然誠意灌注人之見者不知誰是親父子誰是親兄弟教誨子侄勸誘多方一入爐錘不月而自歸繩墨與鄉人處和敬相濟酬酢款洽各得其歡心而苟有不是必引義曉譬溫言委曲聞者感悅性素剛簡黨論以後士趨失正鉛槧之間交際必謹葢為言論不以親舊而阿好不以勢位而撓屈折衷義理自立一見人皆愛而敬

惓晚扁所居屋曰存窩存心之義也君雖不以學問
自處而言行一致衆善咸萃斯固存心中所由出也
及歿宗黨鄉鄰莫不悲悼潛窩公哭之慟曰從此吾
家禮樂崩壞我將疇依桐巢公有文章尚氣節潛窩
公惇行孝悌力學不已師事星湖李先生君之為君
雖其天質之美而得於家庭者蓋多云君前配南陽
洪氏考弼源祖叙功曾祖察訪益亨唐陽尉友敬之
後於余為從母姊長於君三歲柔婉有婦道以 英
宗丙辰三月十四日竟以無后而歿葬於龍仁英藏
各負亥原君歿之年十月合封焉後配青松沈氏考

海朝祖進士一貫曾祖文佐郎漢弼安孝公溫之後
生三男允協允性允學協與性也以文學名食報之
理其在斯歟鼎福衰瘵廢棄之餘文詞荒拙不能贅
揚幽光之萬一俯仰今昔不勝存歿之感謹銘曰
玉之潔兮無瑕金之鍊兮益剛胡有志而無命使天
道而反常耶噫

通訓大夫弘文館修撰李君墓誌銘

並序
壬寅

友人李季承袖其胤氏修撰君狀示余而諭之曰兒
之歿已七年矣我不忍其泯然而無迹也為我誌其
墓可乎余於甲午春旅宦寓城西君惠然來顧觀其

貌玉潤而冰清也聽其言蘭香而蕙芬也余愛之不能捨歲未周而聞君訃愕然無以為心至今有不忘者存何可以不文辭按狀君諱基崧字申仲其先廣州人遁村集之後 宣廟朝中興名相文翼公漢陰諱德馨之七世孫也曾祖奉教諱壽仁祖生員諱光世父趾漢即季承其字也妣豐山洪氏縣監純輔之女良孝公重徵之孫也君生於 英宗甲子正月二十一日生負公夢有白鶴舞於房前俄而得君甚奇愛之幼聰穎有才藻良孝公稱之曰此兒有大人像李氏之門其再昌乎年十一除夜有客呼韻令賦詩

君應口即對有年來年又去來去止何年之句客驚歎曰漢陰十三歲與楊蓬萊唱和蓬萊閣筆汝能趾美矣及長以家貧親老兼治經業己丑入 殿講遇繫辭純通試官承 教問曰天尊地卑乾坤定矣既曰天地又曰乾坤果有異乎君曰天地以形體言乾坤以卦體言所指雖異而其實一也 上稱善之及比較誤過一字 上愕然曰數也因 命留齋待後講 異數也冬 殿講講尚書又通時有純通人見屈 上甚惜之辛卯登式年科選槐院壬辰四月入藝文館為檢閱以下番入 侍屢蒙 天褒癸巳二

月隨 駕毓祥宮特 命陞叅因下 教曰將來善
事我 世孫也三月拜成均典籍四月拜兵曹佐郎
尋呈遞六月拜司諫院正言八月拜司憲府持平十
一月又為正言君屢居言地皆旋遞僦居城西杜門
讀書不喜交遊人望多歸之甲午四月歸覲溫陽感
疾拜吏曹佐郎呈遞八月拜弘文館修撰以病不赴
病勢轉穉沉綿屢朔至明年正月十四日卒得年三
十二臨歿前數日作自道文一篇未成有曰貽塵累
於一室忍聞西河杞婦之哭聲起長程於雲霄俯視
下界滄桑之百變翌曉又吟夢中詩曰穀雨今朝後

青山意周旋及定宅兆即穀兩日也吁亦異矣遺言
喪葬務從儉約借人書冊一一指教而令還之其意
緒之安詳精神之不亂如此嗚呼惜哉自道之衰也
氣化漓而稟得清淑者多不得壽往往天闕悲夫君
娶坡平尹氏考德中祖叅判鼎和生一子一女子命
億娶廣州安氏即余弟鼎祿女女幼某月日葬于振
威五龍洞先塋庚坐原銘曰
名相賢孫早登龍門天於是時若將有為胡歸其遄
顏子之年理有食報宜昌厥後

學生鄭公孺人李氏合窆墓誌銘

並序

孔子曰十室之邑必有忠信吾於盛如見之矣同里
開數十年未嘗見其有喜愠之色稟質淳厚言行無
偽少業武棄之屏居鄉庄治農教子聊以自適無一
毫分外心鄉里稱善人見人有浮薄放曠或喜忌克
人者若將浼已嘗戒子侄輩曰我鄭氏家法謹拙無
害於人汝曹勉之其賢矣哉苟無忠信之心能如是
乎公諱德彬盛如其字也東萊之鄭為海東著姓始
於羅盛於麗大昌於我 朝直提學賜判書光世都
承旨忠櫟其十二世十世九世祖也曾祖諱相周
贈都承旨祖諱碩祚通德郎考諱泰久武經歷妣潭

陽田馥女 明陵甲申公生 元陵己丑九月二十

六日卒壽六十六初葬先隴下以宅祿不利移窆于
廣州治東草月面大雙嶺下已坐原公有賢配德水
李氏生長名門婦行無虧在室事親竭其孝及歸鄭
氏奉姑殫其誠自姊妹娣姒至于僕妾村媪皆得其
歡心恬於財利親家之析產者歸之為父母奉祀之
物接賓客賑窮乏必盡心力而為之不計家之有無
此豈世俗婦女所可人人為之者哉六世祖蔭榮
靖國勳封海豐君曾祖景閔郡守 贈左議政祖椿
考喜培外祖江陵金益聲生先公一歲後公十二年

庚子六月二十八日卒壽七十八葬祔公墓生一男
一女男顯東即從余遊者也有文藝累舉不中女適
陽川許侗顯東一子一女子晉默女適許穗許侗二
女適金廷亮具匡賢晉默生二子幼銘曰
兩美相合德行俱備餘慶之發其待後嗣

通德郎鄭君墓誌 乙巳

記昔乙亥新正後鄭君士一來見余因愀然不樂曰
新歲之夢多應一歲之休咎今余有夢不吉恐其殆
也余笑而荅曰世人以事之難信者謂之如夢周禮
雖有噩夢之占此不足信心之所存發于夢寐若心

定而不動則妖不勝德君其勿憂君信余言而喜不
意其年六月十日以時感卒噫禍患之來果有吉凶
之先兆而然歟鄉黨之內失此良友到老懷思不已
今其胤翼祚奎祚具狀請幽堂之誌其忍辭諸君諱
廣道士一字也海州人 國初貞度公易之後四世
至洗馬希尹即虛菴希良之弟也曾祖諱有徵獻納
祖諱致重考諱震堂并有文行妣僉樞陽川許樟女
忠貞公琮之後 明陵丙申四月十八日君生生四
歲失恃幼多病十歲始入學勤劬不怠文理日進業
公車累不中伯氏司成公歎曰吾弟之蹇屯非人也

命也及卒年四十葬于廣州之大雙嶺午坐君天質和厚樂易與人言繩繩可聽洞見心腑性孝友繼妣李夫人曰此兒事我至誠我不知其非己出也事司成公如嚴父語言之際不敢爭辯曰在下者不可自賢而自遂其意常戒子侄曰男子當以弘重律已寬容持心然後處已接物庶可兩得此足以蔽君之平生矣配杞溪俞氏府使一基之女舉三男長斗祿初娶掌令李徵夏女生一女適蔡齊煥再娶洪重海女無后三娶朴齊斗女次翼祿初娶柳師惠女無后后娶李光孝女生二子一女皆幼次奎祿娶李錫和女

生四子皆幼君少我四歲氣健無疾病余則自少癯廢豈意余誌君墓乎人事之不可常如此悲夫

恭人杞溪俞氏墓誌 乙巳

故友鄭君諱廣道有賢配曰俞恭人生 明陵丙申

四月五日卒 今上癸卯六月二十一日距君歿二十九
十九年葬祔君墓右孤子翼祿具狀請誌余與君善且同開恭人令德聞之熟矣按狀恭人杞溪著姓景安公汝霖之後文府使大修五世孫也曾祖諱櫓監察祖諱命諱考諱一基府使妣丁載燾女在室多令儀及歸于君婦道甚備公姑娣姒無間言君兄弟三

人君其仲也鄭氏本清貧無以資生恭人十年勤苦克家成業使君忘內顧之憂孝敬舅姑不以異宮而有間生則盡供奉之節歿則助槨盛之具雖在老病危篤之中不敢少懈乙亥鄭君卒恭人撫養遺孤有子三人曰斗祿翼祿奎祿隨才教導使長子幹家家業不替仲季頗雅勅故迎師教訓至於成立皆以文行稱於鄉里君仲姊為李氏婦者無子歸依於君恭人事之甚謹使仲子受養姊氏恩之君季判官君廣迪內外及其獨子甲祿并歿甲祿之孤寡無依恭人哀之鞠養如已出又使仲子權奉判官君父子祀甲

祿之死人皆歸咎於判官君及其配李氏宅兆之不利恭人恐其遺孤難保命仲子主其事別擇地合葬恭人德行幹局實非世俗婦人所及也常戒子侄必以實行曰名為士族而惰其四體及至困窮陷於不義者多汝輩業文若不能成則歸農幹家可也不可為半間不界之人又曰細微之恩必思所以相報不報則背人也親族之怨必思所以忘之不忘則傷恩也汝輩勉之賢哉言乎聊掇其槩以誌其幽已在君誌中者畧之

朝鮮國宜寧南沫墓誌銘

並序
乙巳

川者集卷二十三
孤青居士南君必復有良子曰泳字永玉年三十三而天居士哀之甚屬余以幽堂之文曰人孰無子而此子之才行不忍沒執事其圖之生之妻即廣州之安余子生員景曾之女也亦嘗從余而遊則非惟其父哀之余之哀之也亦不後於其父也豈忍辭諸生生於 元陵癸酉幼有奇氣頗不羈居士矯揉義方即折節就矩度稍長勤讀書業程文或從師遠遊或負笈山堂無虛日文詞夙成有可觀人謂摘蓮折桂是朝暮事也不幸以今年乙巳正月十九日染時氣而歿嗚呼痛哉生孝於父母睦於宗族厚於鄉里信

於朋友喜周恤急人之困性又能剛果見人有不是若挽已不少撓人皆愛重而敬憚之及其死也吊者哀哭聞者掩淚莫不曰天道無心使斯人至於此於此可以觀生之為人矣嗚呼惜哉自淳漓撲散而稟氣之清淑者多不得其壽徃徃天闕則命矣哉生之先宜寧人自羅歷麗為衣冠世族 國初開國勳相忠景公在於生為十五世祖七世祖以雄左議政春城府院君號市北 仁廟名相也居士即其承祀之孫而生其獨子也則門戶之託專在於生而生至於此居士之哀之甚也不獨父子之情而已居士之考

曰耆祖曰夏成不仕生之外祖 璿源後裔李惠齡
即黃海伯幼泗之曾孫生有二子一女并幼葬于春
城公墓前馬巖下丑坐原銘曰

爾之來也將有為也爾之歿也何奄忽也四尺之封
佳士歲兮

權君鼻墓誌銘 並序

余有友權氏子鼻字于四改元觀有志操文行年二
十九而歿有賢妻鄭氏痛其泯而無傳也以俚語錄
其平日言行號泣于其父曰亡夫事大人所知也不
幸天闕若無記事之文誰知有吾夫者吾夫嘗道順

菴安公而敬慕之深矣願譯以文字請銘于安公其
父泣而許之翻其語而為狀求文于余余起而受之
曰婦人遭崩城之戚惟知悲痛哀苦而已豈能知士
君子有不朽之名者哉嗚呼賢哉按其狀皆家庭實
行也君是安東大姓而入我 朝有陽村先生近即
其十四世祖也世有冠紱 贈吏議諱頰宣教郎諱
寂通德郎諱挾進士諱珩其四世也妣羅州丁氏諱
志諧女君生于 英宗丁丑進士公仲兄諱瑜娶府
使晉州柳奎運女無子早歿君出系為后自幼有至
性事父母盡其孝色養定省服勤之節無違於禮柳

夫人患痰積沉嬰多年進士公晚罹竒疾幾十年兩家相距一日程君去來奉養左右扶持未嘗一日有懈也本生家有一弟一妹撫愛如手足未嘗忘于懷也性質寬和御下有法未嘗有疾言遽色也宗伯母家業零替事之如母隨事周給未嘗有所闕也閨門之內不設惰容相敬如賓未嘗有狎昵也取友必端不以譁言相加勉以切偲未嘗有握手把臂輕於然諾也世重科名而能知科名之外有為己之學喜從先輩遊日取鄒魯濂洛書讀之務窮實義視世之衒竒而為能多言而為學者若將浼已顏其所居之堂

曰龜伏蓋取韜晦藏六之義而用工之篤未嘗有忽也數年以來有所謂天學者出而世多波靡而從之君始疑而終覺其非與其友金君源星力持正論不少撓屈未嘗有所染汚也此皆君之大節也天假之年而能充其操則成就當如何哉丙申冬余寓君所留止旬餘觀君居家之行承接之際有所心之者矣及歲戊戌余在湖邑橫罹多口君移書有戒此時君年少而慮事及遠余感愛之深矣及此八十垂死之年而頰舌之困又甚於戊戌使君而在則豈無解紛善處之道而今不可得矣實欲為君椎胸而一大哭

也嗚呼痛哉甲辰春丁進士公憂翌年冬又遭弟喪
荐罹喪威腔血殫竭弟死之越三日而感疾竟不起
即乙巳十二月八日也明年二月二十日葬于廣州
之龜川鄉道谷坤坐原君配鄭氏即從余遊者海州
鄭君應祚之女也有一子年幼噫以君之善行而
其報止於是耶自道之衰也得清淑之氣者多不得
壽而惡者反是陋巷東陵自古已然豈天之所好惡與
人殊耶於是而君子曰命也奈命何和淚磨墨為短
詞而銘之曰

在昔韓文公曾銘李元賓才高乎當世行出乎古人

今我權君異名字宛相類才行與之同得年何其似
恨無如椽筆狀君不朽名我辭既無愧庶不負幽明

故成均進士寒居崔公墓誌銘

並序
丙午

有新及第星州崔君鵬海袖其爺生員君之書及家
狀歎余門而言曰曾王考之即世已四十年餘矣狀
碣之文已求於嶺中一二士友而幽竈闕誌刻家大
人願得吾丈之語圖所以不朽命小子替行敢再拜
請余惟不朽人非人人可能况且耄癯精力無以及
此固辭不敢當然崔君受親命而來生員君書意鄭
重義不可辭謹受而讀之公諱后大字子應號寒居

鼻祖漢食采於燃山今永川也子孫仍貫焉六傳而有元道麗季為諫官與李遁村集相友善李公忤賊眈與父避禍于公所公匿而全之人皆義之高祖諱恒慶中司馬自漢京來居于星師事鄭寒岡先生號竹軒曾祖諱輿號鶴峯中司馬 贈判決事亦遊陶門祖諱震衡 贈左尹無子弟諱震華號月洲好學君子也有子諱琦出為左尹後於公為考初娶進士全義李瑜女有一女再娶承議郎完山李鼎女娠公十六月而生即我 顯廟己酉六月五日也公風儀俊爽性孝友月洲公甚器重之九歲而孤能致哀稍

長奉母夫人色養定省左右服勤非有客未嘗離側戊戌丁憂時已不毀之年而執制愈謹與三姊二弟情愛篤摯三姊家皆貧析產資生二弟早歿仲無子以己子子之季有孤教育如己出外王考承議公無後家又剥落墓闕守護公為置田僕供香火禁樵牧其在宗族鄉黨恂恂和易恩義兼至見人急難雖力未周惻怛之意溢於色辭人有不義緩辭微諷使之自媿或以非理相加一切無校終身無喜愠之色絕怨尤之心以是無論親疎尊卑各得歡心而人莫不敬愛公才藝夙成文詞浩澣不屑屑於名利而母夫

人必欲成一名勸勉不已公黽勉應舉嘗赴鄉試主
司者外黨欲行私誘公以為親屈之意公引鄒聖反
身不誠不悅於親之語辭之公行己處事主於寬平
義之所在確然有守如此求感之後不廢程文丁未
中進士蓋不忍負慈教也教子侄必以文行忠信又
以人一己十人十已千之語作箴書籤以戒之使用
力於日用常行之事而常戒不得言人過失家庭之
間未嘗訶叱而子弟服行多有成就者婢僕有過不
喜箠撻或有竊盜者每多掩覆而誨諭之以是有革
心從化者家僮與村丁鬪過誤致死將舉狀成獄公

曉之曰相鬪罪均一生一死命也禁不得聞官但令
厚葬死者其人感恩願以身代為奴公却之平居口
不言私利手不近錢貨僕隸與賈人爭利必禁之自
竹軒以後世篤文學公早孤克紹先業每晨起拓戶
竟夕危坐紬繹經史手寫整其衣冠尊其瞻視八字
揭壁以自警自少至老威儀容止之則終始不差常
以敬謹二字自勵曰要使日間所為無不可對人言
者可也 英廟乙丑正月初九日微感數日而卒壽
七十七用某月日窆于梨峴負良原配昌寧曹氏某
女先公卒墓在法山村後有男子子六人崑崙出為

仲父後嶸嶸武府使崑崙子錫重崙子益重即
生員君有文行嶸子錫重出系鉉重嶸子權重嶸子
運重迪重喻子文重國重厦重學重曾孫若干人銘
曰
有美崔公嶺之秀幼學禔身稱善士小山之狀梅陽
碣字字實錄辭無溢我繼為誌奠幽堂梨峴之麓德
人藏

通訓大夫行全州判官李公墓誌銘 並序 丙午

李君述漢袖其先王考判官公狀歎余而言曰王考
即世今幾六十年矣實有言行之不可泯者故曾受

狀于聾窩而幽堂闕誌願吾丈之文之也余惟我先
祖兩棄公與公同門又有金蘭之契其敢辭諸按狀
公諱錫仁字季受廣州人麗末名臣遁村集之後歷
世卿相我 穆陵賢相文翼公諱德馨之玄孫也曾
祖判決事諱如圭祖郡守諱象鼎考諱允迪出後叔
父象謙妣漢陽趙氏應教威鳳之女文簡公綱之孫
以 顯廟戊申生八歲而孤受業於太學士權公愈
之門篤志幼學庚午選進士丁亥筮仕由 敬寧殿
叅奉已丑遷濟用副奉事庚寅轉尚瑞直長辛卯陞
軍資主簿移工曹佐郎以微事罷癸巳丁內艱居喪

川者集 卷二十一
盡禮辛丑復 除內贍主簿尋出為昌平縣令敦風
教崇節孝詢民瘼革弊政遇飢賑民無捐瘠繡衣
褒 啓甲辰陞益山郡守其治如昌邑有豪族多不
法公繩以律其人嗾臺官劾罷歸恩津農舍時有奉
使南下者得其實歸奏收叙拜司導主簿移 授金
浦郡守一年謝病歸丁未拜禮賓主簿旋外遷為全
州判官全是湖南雄府物衆地大吏猾民橫素號難
治府藏充溢前後莅此者多有與該吏挪移舞弄文
牘詭秘卒難摘發公痛革其弊作科條而嚴防之人
皆躓之自辛丑建 儲時黨議益劇羣不逞之徒醞

釀凶謀鼓唱浮言是歲冬授凶書於府門公報營至
啓聞 上以匿名書上達違制公坐罷數日又有
南原掛書之變 朝廷始驚動 命跟捕令公仍任
明春賊起湖西陷清州殪帥臣公欲治兵戒嚴監司
以無 朝令難之公以先發後 聞爭之即日點兵
時逆魁弼顯為泰仁守託以覲 王舉兵北上至府
西十里三川地一府鼎沸監司恇怯失措公請自當
令將卒分守城堞詰朝有騎白驃一賊往來城外有
窺覘狀公諜知之乃弼夢子師寬從顯賊來也公揣
其意嚴勅門卒勿與客通即詣營門監司閉門托疾

戒閹者禁刺謁公將斧門而入俄而門開公直入卧
內曰此豈稱疾時耶何不強疾登埤死生以之聲色
俱厲監司蹶然起謝且曰計將安出公曰賊自中起
人心難測請易置四門將士以觀其變監司遂令軍
中曰守城節制一聽半刺史使公守西門西門賊衝
也公入衙辭家廟訣家眷馳往信地排布已畢賊又
使人來城底稱傳札鎮營公密使將校掩捕賊逸歸
賊衆知為顯賊所欺一時潰散顯賊亦遁此時若使
賊計得行長驅而北與湖西賊合勢則 國家安危
未可知也公之功豈不偉歟時嶺南賊聲甚急將踰

八良峙直擣完營軍民洶洶有一卒訛言惑衆公立
斬以徇人心稍定公晝夜撫循親自傳饌激以忠義
軍情感服既已亂定都巡撫使吳命恒路由全府而
賚畫使尹淳繼援將朴東樞領軍來會公應接措辦
各得歡心將士皆嘖嘖稱善秋以稅船臭載被拿伸
理帶職還任公引疾辭遡翌年夏湖南伯李匡德褒
聞公竭力守城狀 上特命加資有甚之者不果
是年閏七月二十三日以微感卒於廣州莎村舊第
壽六十二葬于塔谷先塋亥坐原公天稟既高俊爽
有器局性孝友寬仁早失所怙常以祿不逮養於偏

親為深痛致謹於祭祀每值諱辰必齋沐具羞肅立待曉殫其如在之誠伯氏早逝仲氏夫妻俱歿養生送死無憾而奉伯嫂如事親內外親戚接以恩愛隨事周恤交際之間待以誠信不以甘壞有異前後作宰洞開官門窮交貧族掉臂而入稱意而歸其治臨民仁東吏嚴律已廉聽訟明嘗曰居官無愧此心足矣違道干譽以賭名吾所耻也公之才識器量早負時望人以公輔期之遭時抹掇沉頓下僚不大展其所蘊人皆惜之配務安朴氏右尹澄女婦德俱備生與公同年歿後公十三年葬祔公墓左生一子一女

子光蘭進士孝友有文行無子以再從侄述漢為後有四女鄭師伋韓有仁上庠李舜燮權浚其婿也女適洪日煥進士三子侃儻儂三女權德身吳處中申史澳正言其婿也銘曰

繫公偉器用未大施棲遲郡縣不以為卑瘼櫛惠孚吏畏民懷危城捍賊保障江淮逆酋遁逃凶醜顛踣勘亂之功公實為首 聖主褒嘉亦或基之在公何損世道可喜塔谷之原鬱鬱佳城百世在後請徵斯銘

成均進士吳公墓誌銘 並序

吳君心運狀其先府君行託鼎福曰我先人有志行而為子者不忍使沒沒無聞願吾子之誌其墓也余雖不文吳君之寄意鄭重又有姻好之誼其敢辭諸按狀公諱尚溥字天如同福人高麗侍中文獻公大陞之後高祖諱百齡號默齋官吏曹叅判與兄晚翠公諱億齡俱為宣仁兩朝名臣曾祖諱端號東巖官黃海監司祖諱廷垣號醉翁官忠清監司出系叔父贈左贊成諱竑之後三世俱贈領議政考諱始壽號水村官右議政妣貞敬夫人安東權氏奉事贈吏曹叅議諱瑱之女吉城尉諱大任之孫公生

于顯廟庚戌丰標如王及長秀偉有器度人皆以遠大期之庚申朝局一變先公為黨人所螫謫三水權夫人憂憤而卒翌年先公竟被後命公時年十二已巳大臣筵奏暴議政公寃使之復爵致祭癸酉公始選進士試甲戌黨人復入先公復罹罪籍公與伯氏含冤抱慟如不欲生乙未伯氏歿丙午公擊鼓竟為當路所沮積恨成疾丁酉七月五日卒于水村得年四十八時仲侄載運在公州墓下忽聞哭聲出於議政公墓庭心甚訝之數日而公訃至考其日則即公喪逝日也此其冤鬱之氣感觸而然也吁亦

異哉今 上甲辰公之孫錫忠繼公志又擊鼓上聞
上特命伸理復其官爵黨人子孫沮之而不得遂
於是公志得伸而神人無憾矣古語云公論百年而
後定果非虛語也公性質寬和孝友篤至宰物濟眾
綽有其具而少遭閔凶至痛在心竟闕其年悲夫某
月日葬于公州先塋東麓負坎原前配韓山李尚鴻
女生一男星運後配河東鄭元鍵女賢淑有女行生
三男翼運心運箕運女未笄而天星運二男錫文錫
明三女適李之民尹東元柳樂源翼運無子取箕運
子錫一為後二女適南履百崔炆心運二男錫履進

士錫庚四女適權揆進士洪璉崔海聞尹行復箕運
二男錫一錫忠一女適金得仁內外曾玄三十餘人
銘曰

福川之吳海東華宗歷世簪紱乃卿乃公公乃挺生
若將有為遭世罔涯萬事凌夷家冤未湔血腔內薰
抱恨而歿哀動先墳賢孫繼志 聖主下矚名利丹
書爵秩如昔公靈在上想必興感孝子之心庶幾無
憾銘無溢辭敬奠窀穸之東君子攸宅

恭人河東鄭氏墓誌銘

並序
丙午

鼎福少時聞諸長老之言吳相國孫家在果川兄弟

川集卷二十三
四人奉母夫人夫人持家嚴正有法度每早諸子進
省而退次諸婦從之日三如此閨門井井終始無怠
云果是賢夫人也余敬而心之者久矣今者吳友心
運氏狀恭人行錄請幽竈之文鼎福既誌其先公之
墓則復何敢辭按狀恭人河東鄭氏進士吳公尚溥
之繼室也曾祖諱弘量官軍資奉事祖諱墉務功郎
考諱元鍵號覺軒世稱處士妣星州李氏通德郎諱
翊夏之女持平諱惟碩之孫也恭人容儀丰粹識度
純明自未笄也賢淑之德孝友之行為父母昆弟所
愛重癸未歸于吳公事夫子無違德常曰夫婦雖齊

體何敢惰慢也公前配李氏生一子星運年纔四歲
恭人鞠育如己出恭人連生三子教養恩愛鴟鳩均
一自在孩提示以義方至於華美之服膏粱之食使
不得近焉諸子循循奉承不敢怠忽恭人尤長於治
家閨政肅穆日治紡績未嘗自逸分課女僕使無無
事而食省浮費祛文飾或留贏餘以備不虞經理瞻
悉不使公有內顧之憂處心仁恕雖僕隸之賤恩信
周洽篤於親親宗族歸心眷恤鄰井隨有隨施絕無
吝惜之意故人皆戴慕丁酉遭公喪溢米不入口者
累日不脫衰經哭泣幾殆者三年嘗言險釁一息尚

存未亡者以幼孤無託祭奠無主而然也未死之前所以竭力者惟在祀典每值祭日必親自具羞五十年如一日戊戌并遭父母喪哀毀逾禮辦備歛葬之具葬于梓川春秋節祀躬執祭需終身不衰又置祭田俾為香火之資人皆稱其孝恭人生于我 肅廟甲子歿于 英宗庚寅七月初六日享年八十有七九月某日葬于公州治東十里大梧洞庚坐之原三男翼運心運箕運一女未筭天翼運系子錫一二女適南履百崔炆心運二子錫履進士錫庚四女適權探進士洪璉崔海聞尹行復箕運二子錫一出系仲

父後錫忠一女適金得仁內外曾玄若干人嗚呼恭人事親孝事夫順教子義勤儉治家家道賴以不墜婦人之行豈有過於是者乎常以舅寃之未伸為終身之痛今 上甲辰孫錫忠鳴寃得伸人皆咨嗟嘆息曰吳氏有子矣恭人之懿範令譽聞之熟矣今得賢胤所撰狀文益得其詳掇其大略如右而為之銘曰

君子之配女士之行仁孝婉婉本乎天性敬順夫子率禮無違撫教膝下化導中規勤以家成壽以德隆宗戚感恩鄉鄰頌功彤管秉筆宜編淑媛我銘不諛

敬告後昆

繕工監直長洪公墓誌銘

並序
丁未

孝顯之際縉紳家家法之正內行之修必推南坡洪先生而先生長子諱冕字某幼以孝聞及長棄舉業專意養親家本清貧滫飲之節手自供辦未嘗須臾離側庚子丁內艱執制逾節先公隨事扶護俾不毀傷壬寅先公繼娶權夫人公事之必謹出入之際拱立階下白首猶然夫人以其執禮太過止之而終不廢焉先公位躋宰輔僚友多勸公蔭補先公語之故公對曰一出仕路侍側多曠諸弟皆幼無可替行不

願仕也先公感其誠意不復強焉庚申先公為黨人所螫謫明川公隨往辛酉陪繼妣會謫所癸亥先公量移文川年高病甌公涕泣侍湯晝夜不懈時公年至六旬持身如嬰兒扶持供奉無或怠忽至於灑掃之役及展卷衾褥洗滌廁牕必自為之旁人或請代行則曰至情無過我不之從焉北土荒遠甘旨之物不如京洛公至誠求聚不至缺乏侍謫八年洞屬如一丙寅丁繼妣憂丁卯先公易簣于鵬舍公攀擗哀號如不欲生返葬于安城因守廬君子曰孝子之行也繼妣有三子年皆幼公友愛篤至教育撫養已也

服闋 除青巖道察訪公感激 恩遇黽勉就職公
友人贈以詩曰隱嘿躬行孝無人識此人一官今始
得誰惜已衰身人謂實錄後 除繕工監直長不就
戊寅七月卒年其生甲子壽七十五九月葬于先公
墓左乙坐原公孝友天至孤露以後尤謹祀典每遇
忌辰及節日墓祀前期灑掃預具祭需務盡誠敬雖
年踰七十躬自將事性又清白先公在時外邑例問
無絲毫私徑先公嘗入政府有人納烏賊魚一包於
內公知之追還以是先公清德尤有名於當世其在
青巖洗手為政一塵不染歸時奴婢貢物封留官庫

人曰是無益於國而徒為下吏所私公笑曰不愧我
心足矣臨行驛吏盛辦酒食以餞公只飲一杯還之
曰此足以知汝輩情矣臨事不苟蓋如此李三宰鳳
徽南坡公遺事有曰長子直長公無人於先生之側
則竟日侍坐客至則手正客坐退避家法然也人罕
知先生子弟有直長公者蓋其韜晦隱德人無知者
而云然也公之先南陽人自同正先幸始勝國至
昭代簪紱相繼曾祖諱可臣號晚全以學行薦用為
洪州牧討賊策靖難勳封寧原君判刑曹 贈右議
政謚文莊公祖諱榮漢城庶尹考諱宇遠即南坡先

生判吏曹 贈領議政妣 贈貞敬夫人延安李氏
 延原府院君光庭之女公配新平李氏考諱廷翊生
 三女慶嘉會進士鄭錫圭李應運其婿也取從兄子
 日知為後將仕郎側室子日鎮日知生六男任健脩
 尙儔一女適吳應運日鎮一子倍慶嘉會一子嵩
 鄭錫圭三子昌明最明吳明李應運二子寔必內外
 曾玄四十餘人銘曰

先民言孝百行之先公心洞屬一此無愆處內居外
 奉以周旋八載關塞殫竭誠虔甘旨躬執厠膺手湔
 順德之推觸事沛然晚縻郵官歸來一鞭銘無愧辭

昭示永年

處士苞西洪公墓誌銘 並序 丁未

洪君璉編其先人行錄曳衰而來叩余言曰先人有
 懿行隱德而世無知者若湮沒無傳其何以詔後昆
 乎願得一言以圖不朽余於洪君有忘年之契且慣
 聞公之事矣不敢以老耄不文辭謹按公諱福全字
二字苞西其號也南陽人 贈右議政文莊公寧原
 君晚全先生諱可臣之六世孫 贈領議政行吏判
 南坡先生諱宇遠之玄孫曾祖直長諱冕祖諱日知
 將仕郎考諱健妣白川趙氏北兵使相周之女公以

川者集 卷二十三
三十一
我 明陵丙戌十二月二十五日生後八十一年丙
午五月十七日卒閏七月戊寅葬于本郡寶山龍石
門乙坐原公幼有至性遊戲不離親側及長左右服
勤一遵禮度庚午丁外艱執制愈謹而色養先夫人
備至甲戌先夫人病革血指禱天及遭憂哀毀逾禮
晨謁祠廟到老不廢尤致謹於祭祀謹齋戒潔染盛
坐以待曉或閭里不安未嘗隨俗廢祭親墓莎草必
手自芟治及于先代墳塋定以一年二度第三叔父
晚來貧窘事之如父時食節服盡心供奉二十年如
一日有姊妹二人友愛無間姊歿有一子纔三歲公

抱歸乳養至于成立又分產於妹氏使安生理有堂
侄早失明無歸公率育教養既長為之治產授室使
奉其祀家居教子無非義方敦睦宗族款接親知各
隨踈戚致其恩義周窮振急如恐不及聞鄰里有屢
空者每食必除半添以他飯以送之曰鄰有饑忍獨
飽乎其仁心有如此者余讀周禮大司徒以鄉三物
教萬民其二曰六行孝友睦婣妊恤公可謂六行俱
備之君子矣公追其孝思以及於先八世祖墓在果
川歲久缺享置墓田祭以十月丁日南坡公世盡當
桃長房貧甚公議建廟置田又結宗契享祀無闕庚

川卷集 卷二十三 三十三
子建四位石物晚金南坡遺集未刊公唱論買鑄字
印行數百本此豈私力所辦者耶公重厚有器度不
妄言笑無疾言遽色不言人過失不與人校性儉素
食不兼饌衣取蔽體布褐藁屨或徒步而行御下寬
簡奴僕或有欺蔽略施箠楚還給所偷之物曰汝有
所用而為此後勿復為謂家人曰此習人奴常事防
閑太過渠安所措手足乎待人接物誠意相孚石役
印集之際工役繁興而不動聲色人皆樂赴觀者歎
服少治舉業程文各體俱備嘗發解不利公車先君
喪後仍廢舉作字楷正急遽無胡草晚來與從弟性

全詩曰耄歲當存兢惕心吾方七十四年今夙宵耿
耿期無忝俯仰人天敬畏深觀此可以知其所存矣
噫公之行義幹局誰之不如而竟窮沒草澤不過為
一鄉之善士而止豈不惜哉公素康寧無疾病燭細
爵堅與少壯等壬寅行重宰宴人以五福俱全稱之
配漢陽趙氏諱某女生一子璉有文行璉二子始濬
始淵銘曰

周禮六行公實兼之箕疇五福公庶幾而宜揚而室
浮榮何貴賢胤克肖家聲不墜積善餘慶易訓可徵
銘以為文敬告雲仍

雲谷處士趙君墓誌銘 並序

駒城之雲谷有隱君子趙君以行義聞余欲一訪而病未果烏歲乙巳夏君枉顧衡門與余同庚而長余一日一見如舊洞露心肝意款款而語諄諄可謂樂易君子者矣留後約而別別纔十朔而承君訃嗚呼痛哉君諱鼎重字大受漢陽人 國初佐命功臣左議政襄烈公仁璧之後簪紱相繼六世至 贈左贊成忭為己卯名人三世至奉事國老以學行進曾祖諱耆祖諱鳳興有文行無子以叔父諱耆子龜興之仲子擢為後即公考也妣安東權氏縣令歛之女公

生于 明陵壬辰十二月二十四日幼穎悟勤學儕流莫及及長見世道危巖家業剝落專意幹蠱勤於理財儉於節用未幾而產業饒厚性孝友日侍親側愉色婉容以樂其意不徒以飲食忠養之而已定省之禮溫清之節未嘗或怠僉知公歌酒自娛喜賓客勅家人別具釀資數請長老親知或設壽宴以樂之至于季年洞屬如一壬申丁內憂甚而當撤筵公有不忍稟于僉知公行三年下室之饋識者不以為非癸未遭外艱居喪諸節不以老而少衰服闋每遇親忌悲慕如始喪推其孝思尤謹於奉先粢盛之具邊

川者集卷二十三
豆之需必先辦備竭誠齋沐務致蠲潔遷祖墳之各
墓田人稱其孝有三弟姊妹友愛篤至與兄弟同居
一壺食必共卓寢必同衾休戚與同兩姊在半百里
之地頻頻往省或團會累日一妹寡而貧窶特加周
恤出三百金買庄以居之凡於疾病救療之物吉凶
費用之需無不躬辦以助之人稱其友貧交窮族之
不能婚喪者必優助之兒時句讀之師其老也衣食
之其死也賻贈之待宗黨愛敬備至公素喜酒常有
時釀與客對酌不醉無歸佳辰令節闔族團樂或內

外同樂必具時食若煮花蒸槐烹狗擊鮮相與為樂
姻婭宗族各得其歡心人稱其睦媻妊恤公可謂六
行之俱備也公敏於見事通於識務實有需世之才
而世無所知不過為一鄉之善士而止惜哉丙午正
月初十日卒三月葬于家後辛坐原前配安東權氏
佑之女先公三年生戊午十月卒葬雲谷先塋下中
配清州韓氏命來之女後公十年而生乙酉十月卒
初葬雲谷東岡後遷祔公墓左二配皆有婦德後配
全州李氏命植之女公三娶俱不育以仲弟鼎大子
煥為後煥有賢行歿於公喪成服後娶礪山宋慶運

川卷之二
女生四男二女男奎泰奎恒奎昇次幼沈華潤權德
二女婿也公承重孫奎泰袖朴君處顯狀曳衰來求
幽堂之文義不可辭叙之如右為銘曰
公之德行古人是景公之才敏無愧古人有如是之
才之德而窮歿於草澤吾誰咎乎命之否也

銘恩窩韓公墓誌銘

並序
戊申

公諱柱岳字宗甫姓韓氏上黨人鼻祖蘭佐麗祖策
勳封自是族大而盛跨歷兩代纓黻相望而麗李文
敬公脩號柳巷文章德業師範一世其子文烈公尚
質入我朝官大提學奉使如京師受朝鮮國號而

來號竹所文烈孫明潛錄靖難勳封西原君西原子
堰大司憲清平君四世而至左叅贊準錄平難勳封
清川君號南崗生禮曹判書 贈右議政汝稷號十
洲於公為六代祖曾祖諱塾師事眉叟許先生經行
薦官金川郡守祖諱德欽十九司馬以孝早歿考諱
洵通德郎妣進士晉州柳以章之女以 明陵己丑
生公于會賢洞第豐姿偉幹巖然有器度金川公竒
之命小字曰山嶽以其氣貌似之也及長文藝夙成
未冠連發解人謂韓氏有子矣 英宗戊申逆變通
德公及弟注書游宣傳洸為凶逆所誣駢殞於拷訊

川者集卷二十三
三十一
之下人莫不寃之時公年才二十奉母歸富乎鄉庄
力耕養親含寃忍痛二十五年以罪人自處癸酉夏
上悶旱理寃獄公 駕前上言適值他寃家五人
之訴一時沓奏 上命皆竄配公謫鎮海縣明年宥
還自是長在洛下弊衣草屨日號訴於當路之門一
時卿宰動色敬接莫不矜其情而哀其寃乙酉冬
上違豫至翌年四月朝廷朝晡問 安公日必先期
詣 闕下待大臣之來泣訴於前累月未已祈寒甚
雨無變諸公稱之曰韓孝子大臣陳達有勿錮子孫
之 命旋又 駕前上言以猥屑又配古羣山島翌

年春蒙放而公不少沮呼籲猶前辛卯 上設申聞
鼓以達寃公首擊之 上知其寃 命去罪籍復其
官公聽 傳旨顛仆號痛四拜而退翌朝率子弟又
行四拜縉紳驚歎各司隸臺交相賀曰多髯韓老今
日得伸雪矣公常以家寃之未伸痛切心骨如不欲
生雖顛覆道路觸冒風雨一心不懈躡而復起二十
年如一日卒能天心助順 聖意回悟夫雪至寃以
遂其願非志氣之強誠孝之篤能如是乎噫古今之
抱寃而未伸者何限子孫之心豈有異哉然或時有
利鈍亦懾怯而未能為觀公之事可以知所處矣公

卅卷集 卷二十三 三十八
卽歸鄉廬扁所居室曰銘恩窩逐日謁廟必別設一
席東向先四拜每除夕入城元曉詣 闕行拜 國
有哀慶亦如之未嘗以衰老自處以終 英廟之世
公素有幹局禍變之餘產業蕩析而收拾遺物不失
舊規有幼弟三人從弟妹四人又有堂叔二人年幼
公以一身為五家之長皆率育而成就之孳孳於睦
宗族恤孤寡恩義周洽人無間言見人有難方便周
濟與人交終始不渝尤加意於不報之地追其孝思
家祭之外事闕先代必先諸族竭力為之先祖西原
君嗣絕闕享公為立宗而主其祭又置田於清平君

墓下春秋修事約宗人為花樹會公必自厚辦以率
其不如約者雖以禍家窮處滓辱備至而曠然理遣
不喜與人較務以善感其心鄉人之素凌侮者未乃
化而稱其賢丙午春 朝家命郡邑舉才行鄉論以
忠孝俱全才德兼備為薦目此可見公論之不泯者
而公之致此者皆順德之推而然也是年臘月八日
氣不平遂就枕卒壽七十八翌年二月葬于富平葛
月里壬坐原配青松沈氏叅議一義之女有婦德善
克家生以己丑卒以戊寅九月十九日生一男一女
男秉謙生員女適宋聚儻繼配延安李氏漢翊之女

亦婉順勤儉生以戊午卒以乙未五月二十一日而
夫人皆從祔公墓公未嘗從事學問而孝友根性內
行淳備平生言行自合規度樂聞已過或值情外之
謗未嘗分解而必自反焉常誦古人志行上方分福
下比之語以戒子侄日必早起拜廟退詣書室終日
對案諷誦不撤常舉東坡若話七十年便是百四十
之句以語人曰人生世間晝夜相半豈可耽睡空送
一半歲月又以為禍變之家常懈於教子弟人家讀
書種絕無以世其家勸課勤篤一子小成姪性謙亦
以文名皆循循雅勅有法家風余熟聞公名恒有願

交之意乙未公訪余于京邸戊戌又訪于木州之衙
舍一見可知為厚德君子也生員君以李寧海寅爨
狀來請幽竈之文義不可辭實有託名之願不以不
文辭謹依狀畧叙如右銘曰

先民有言孝為行源推之百事左右逢原有美韓公
稟此順德早嬰家禍晚被昭釋籲天叫闔至誠假神
名動京外化洽眷鄰養德林泉介石貞吉所樂者存
倘來何恤葛月之麓君子攸宅銘辭不諛敬奠窀穸

通德郎聾窩朴公墓誌銘

並序
戊申

不有知己之友誰發知己之志不有後死者之言誰

識先死者之行哉生而公死豈忍使公志行磨滅哉
公諱思正字子中號聶窩務安人遠祖暹佐麗顯宗
著勲業官左僕射簪纓相傳八我朝有刑曹判書
義龍冠冕不絕七傳至郡守應善號草亭仁廟改
玉薦遺逸直拜恩津縣監即公之五世祖也曾祖諱
昌夏嘉善贈吏曹參判祖諱澄漢城右尹考諱履
文號古心齋官掌令文章鳴世妣淑人韓山李氏縣
監雲根女公伯父僉知諱震文娶豐山洪氏持平重
鼎女繼娶長興高氏皆無子以公為後公生于肅
廟癸巳三月卒于今上丁未正月七日壽七十五

三月葬于廣州慶安望靈洞坤坐原公夙悟有文藝
世稱竒童及長見世道危巖無進取之意不專意於
舉業人多惜之公有至行孝順父母養志無違生養
家前後喪皆三年食素謹祀典務盡誠敬日必晨謁
祠廟至老不廢此余所目覩也心齋公任砥平病遶
官事叢脞公與諸吏考察各房文書分毫不敢欺時
年十三長老聞之驚歎曰此兒可兼六曹郎任此余
所耳聞也致力於四禮小而儀章度數大而疑文與
義辨釋明白深於數學始以乘除加減終於天元開
方正負句股之術燭照而龜計長於譜學東方大姓

無不貫穿而統會至於僻姓隱派亦能隨問而答人之缺世而失跡者多來取考真古所謂肉譜也此皆公用工而得力者也尤長於經綸常曰為治不法三代皆苟而已其所談論酌古依今皆鑿鑿有據噫公有絕人之行希世之才而竟未一試終老草澤嗚呼公著述有家禮酌通四卷筭學指南二卷百氏譜畧數十餘卷藏于家配安東權氏世光之女副學璿之曾孫生與公同年歿于英廟壬申五月有二子二女後配泗川睦氏尚周之女生于己酉歿于辛巳九月無育葬于天安毛山面西坐子處順處顯女適安

鼎祿即余之弟也次適金冷處順無子取處顯子為后處顯三子一女子命鎮出系處順餘并幼安鼎祿三子三女子景淵景夏景思女適成孝詰韓秀運李命億金冷有系子世箕遂為之銘曰
人或有有才而無行亦或有有行而無才才行之不相稱久矣公能摠貫而兼有竟窮歿於荆榛命之屯矣時之否矣將誰咎乎

順菴先生文集卷之二十三

